

Homber haya morto banda di Santana di Zeewijk

Dos homber a asesina ciudadano Angela y tira su auto den lama

Informacion cu SOLO DI PUEBLO ta dispone di dje ta bisa cu e ciudadano Angela cu a wordo haya morto algun dia pasa, laga atras banda di santana di Zeewijk, a wordo asesina. E agresornan

ta dos persona. Mas leuw nos a bin compronde cu e auto di Angela muy probablemente ta tira den lama.

Esaki sigur ta un acto hopi rechasabel y

nos a compronde cu autoridad tin tur pista di e dos asesinan, kendenan mester bay duna cuenta y asumi castigo di prison pa loke nan a haci.

**Mal maneho den SEPPA/CAPPA
Tur empleado cu a spaar nan
placa den CAPPA/SEPPA tin
chens di perde tur cos
Banco Central a tuma medida**



**Boto di piscado Venezolano
intercepta cu droga**

**Captura di boto cu droga hasi pa
Zr.Ms. Friesland y Wardakosta**



**Chofer cu a
huy despues
di accident a
wordo deteni
despues**



Emmanuel Bermudez
DENTAL SOLUTIONS

**24/7
SERVICE**

For URGENT
Dental Emergencies
please call
+297 585-3255
+297 592-9398

Homber bebiendo alcohol y causando hopi molester dilanti di un Supermarket



Diadomingo algo prome 8'or di anochi, presencia di polis a wordo pidi na un Supermarket na Jaburibari, pa un homber cu tabata bebiendo alcohol den porta di e supermarket, causando molester na clientenan y ni kiko e doño bise e no tabata haci caso.

Segun e doño for di mainta e la bay sinta dilanti di e Supermercado bebe, e tabata causa molester henter dia na e clientenan di e supermarket. Nan a stop di dune bende alcohol y e tabata laga otro hende cumpra alcohol p'e.

Na dado momento e doño di e Supermercado a cansa y a dicidi di yama polis. Na yegada Polis a papia cu e doño di e Supermarket y despues nan a papia basta duro cu e homber. E homber a primintinan cu e no lo sigui bebe mas dilanti di e Supermarket y cu e lo bay cas.



GLOBAL MONEY WEEK TA TUMA LUGA PA PROME BES NA BONEIRO

Minister Xiomara Maduro a dirigi palabra na e hobennan durante di e apertura



Oranjestad — Riba invitacion di e organisadonan di Global Money Week, Minister Xiomara Maduro a dirigi algun palabra na e hobennan participante, durante di e apertura cu a tuma lugá dialuna dia 21 di maart.

E mandatario ta aplaudi e bunita iniciativa di Terramar Museum Bonaire pa trece

Global Money Week na Boneiro cu danki na e colaboracion di varios instituto financiero na Boneiro a haci posibel cu e hobennan por experiencia e tremendo proyecto educativo internacional aki. Minister di Finansa y Cultura a trece dilanti cu e actividadnan financiero di Global Money Week lo empodera cada un hoben participante pa siña

di ta mas responsabel riba tereno financiero for di un edad jong. E hobennan lo compronde e importancia con pa maneha nan asuntunan financiero y bira mas consiente di esaki. Esaki lo yuda nan pa tuma decisionnan financiero responsabel awo y den futuro.

E dignatario a subraya cu na Aruba tambe e hobennan a yega di participa na e Global Money Week y tabata un placer pa ora ela bishita e actividadnan pa scucha e testimonio di e participantenan con e actividadnan a aporta na amplia nan conocimiento financiero.

Minister Xiomara Maduro ta encurasha e participantenan na Boneiro pa haci bon uso



di e oportunidad pa pone hopi atencion, participa y haci pregunta durante di e sessionan e siman aki. E mandatario a expresa, 'Mas bo sa, miho decision financiero bo por tuma desde awor y den futuro, y di e manera aki aporta tambe na e progeso economico y financiero di un miho Boneiro. Na Hulandes tin un dicho ta bisa 'Jong geleerd, oud gedaan'.

Minister Maduro ta gradici Terramar Museum Bonaire, Embahador di Global Money Week sr. Serginho Finies y tur partner cu ta haci Global Money Week posibel. Masha danki pa e tremendo iniciativa. Na tur hoben cu ta participa, Minister Maduro ta desea hopi exito y un siman fructifero yena cu hopi sabiduria.

Mal maneho den SEPPA/CAPPA

Tur empleado cu a spaar nan placa den CAPPA/SEPPA tin chens di perde tur cos

Banco Central a tuma medida

Awe Magaly Brito ta para dilanti un acusacion serio di mal maneho financiero cu placa di empleadonan publico, miembro di SEPPA, den asina yama e spaarfonds di CAPPA.

Tur cos ta muestra cu desde algun aña caba tin hopi cosnan ta sosode cu no ta corecto. No ta cumpliendo cu reglanan estableci pa Banco Central. Banco Central a emiti un carta picante unda nan lo tuma medida di kita e licencia for di CAPPA, pero kico te caso? CAPPA tin e placa pa paga bek tur su miembronan nan placa? Parce cu no!!



Tanto na trabao, salario, tin hopi hende riba payroll, unda te hasta a pone ruman den servicio cu no

sa nada die trabao.

Pues, awe dia 23 di Maart lo tin un reunion, unda SEPPA/CAPPA

mester duna cuenta na tur nan miembronan, cu ta na punto di perde tur nan placa.

Boto di piscado Venezolano intercepta cu droga

Captura di boto cu droga hasi pa Zr.Ms. Friesland y Wardakosta



Den bon colaboracion ku Cuerpo Policial Aruba

E barcu di marina Zr.Ms. Friesland resientemente a logra para un boto di piscado Venezolano sospechoso riba laman grandi. E contacto a keda descubri pa un avion di patrulla di Wardacosta

Mericano. E boto tawata riba un ruta conosi pa contrabanda despues di cual Friesland a keda dirigi pa controla e boto. Ku e barcu rapido di interceptacion, e FRISC, ku na bordo un ekipo combina di tripulantenan di e barcu y Wardacosta Mericano, e boto a keda

persigui. Na yegada di e FRISC den serkania di e boto, esaki a cuminsa zink. Riba esaki mes ora a actua pa trese e pasaheronan a bordo di Friesland. E tripulacion di Friesland a hasi tur intento pa mantene e boto riba awa, pa asina por controla esaki riba contrabanda.



E boto sospechoso a keda di tou pa Zr.Ms. Friesland y hiba Aruba caminda a entrega esaki na Wardacosta su punto di sosten na Aruba, pa por hasi mas investigacion.

Pa motibu ku e boto tawata parsialmente bou di awa, e ekipo di buceo di KPA a hisa e boto ku nan materialnan pa asina por a controla esaki. Durante

e control riba e boto hasi pa un ekipo di e punto di sosten di Wardacosta na Aruba, un gran cantidad di pakete ku probablemente droga aden a ser haya.

E seis personanan ku nashonalidat Venezolano, y e paketenan a keda entrega na e 'unit georganiseerde criminaliteit' di KPA pa mas investigacion den e caso aki.

Minister Geoffrey Wever: Gobierno di Aruba ta apoya companianan chikito, mediano y entrepreneurs

Siman pasa Minister Geoffrey Wever hunto cu Stichting Qredits Microfinanciering Aruba, representa door di señor Elwin Groenevelt, Director General di Qredits, a firma un Memorandum of Understanding (MoU) pa apoya “midden en kleinbedrijven” (MKB) na Aruba den e fase di recuperacion despues di e crisis di Corona. Qredits ta estableci desde 2017 na Aruba y ta otorga credito social pa stimula entrepreneurship door di ofrece un “micro-krediet” y tambe ta mentor entrepreneurs pa habri un negoshi exitosamente y brinda demas asistencia. Desde establecimiento di Qredits a otorga alrededor di 300 prestamo na un balor di alrededor 11 milyon florin.

E crisis di Covid-19 tabata un golpi duro pa e MKB. A pesar di e proyecionnan economico positivo, hopi comerciante di MKB tin dificultad financiero. Qredits a aserca Minister di Asunto Economico

cu e peticion pa un contribucion financiero na balor di Afl. 150.000,- den año 2022 den cuadro di e programa di recuperacion economico di Aruba.

Door cu Gobierno di Aruba ta kere den stimula entrepreneurship, gobierno lo duna un contribucion financiero na Qredits na balor di Afl. 150.000,-. Cu e fondonan aki Qredits por ofrece diferente “recovery loans” na un interes mas abou compara cu e tarifa di e “micro-kredieten” regular. Qredits lo continua cu guia di entrepreneurs den hacimento di negoshi den temponan dificil y lo organisa diferente programa di training pa comerciantenan cu ta bai cuminsa un negoshi, manera dos training “Small Business Academy” pa 40 persona cu ta aspira pa bira comerciante y diferente proyecto piloto di e programa “Be Your Own Boss” pa 200 alumno/ estudiante di scolnan secundario y MBO.



“E trabou di comerciante ta un di e trabounan mas dificil na mundo” segun director general señor Elwin Groenevelt. Ta dificil pa start-ups haya financiamiento na e banconan regular. Qredits ta e organizacion cu ta yuda start-ups cu traha nan business plan y cu financiamiento pa por habri nan negoshi na un bon manera. “Nos ta haya hopi importante pa traha hunto cu Gobierno di

Aruba na sostene desaroyo economico.”

Pa minister Geoffrey Wever “stimula entrepreneurship ta parti di e vision di Gobierno di Aruba y di mi como Minister di Asunto Economico”. Qredits ta hunga un rol importante den e economia di Aruba door cu nan ta sirbi un segmento di e mercado cu tradicionalmente no tin acceso facil na financiamiento. “E tipo

di cooperacionnan aki ta importante y mi ta sigur cu ta bai tin mas oportunidad pa nos partner up cu Qredits of otro institutonan financiero”. Tambe ta spera di wak cu e mundo di MKBs, e start-ups y e personanan cu ta aspira pa bira comerciante por haya beneficio di e actividadnan aki y cu di e manera aki e economia di Aruba por sigui avansa.

Homber deteni despues di problema cu su pareha

Sero Preto SN - Diadomingo atardi polis a bay un adres na Sero Preto, unda cu un problema di pareha tawata bayendo for di man.

Den algun minuut cu polisnan a yega a bay over na detencion di un homber.

Despues cu polisnan a papia cu ambos persona, a detene e homber pa posibel agresion. Transportwagen a wordo pidi y den algun rato busca e homber y trece warda di polis.



Dialogo riba documentario “Dande di Aruba”

“Dande di Aruba” ta un documentario bou direccion di e cineasta Cindy Kerseborn (dfm). Den e documentario cinematografico aki por mira diferente aspecto di e desaroyo di nos tradicion di Dande na Aruba. Dande ta un tradicion tipico di fin di Aña na Aruba, cu tanto grandi como chikito ta identifica nan mes cune como parti di nos cultura.

Dande ta un celebracion cu probablemente a cuminsa den siglo 19 y durante e transcurso di aña hopi hende kier sa ta kico ta e origen di Dande? Pero tambe kico nifica e palabra Dande? Y si Dande a y ta existi solamente na Aruba?

Paemotiboaki Universidad di Aruba hunto cu Comision Nacional pa UNESCO di Aruba y

Fundacion Mi Cutisa ta tene un dialogo entre publico y algun persona cu a contribui na produccion di e documentario.

Ruby Eckmeyer, Alexis Tromp y Arthur Kelly lo duna un presentacion di e proceso- y retonan cu nan a confronta pa por a produci un documentario cinematografico riba nivel profesional. Adi Martis lo duna un discurso historico riba investigacion di e historia di Dande. Y na final lo bay dialoga hunto cu e publico presente riba e Convenio di UNESCO pa por pone Dande riba e Lista Representativo di Herencia Cultural Intangibel pa Humanidad.


Esaki ta e comienso di un dialogo cu e comunidad di Aruba pa involvi nos hendenan den e discusion pa identifica kico tur

nos ta indica como parti di nos herencia cultural intangible. A base di identificacion di e elementonan cu comunidad di Aruba ta reconoce di importancia como parti di nos herencia cultural, lo por bay stipula un Lista Nacional di Herencia Cultural Intangibel di Aruba. E lista aki ta di suma importancia pa por consentisa nos pueblo kico tur mester haci pa proteha nos herencia cultural intangible.

E dialogo aki ta tuma luga na Universidad di Aruba den sala A y tambe virtualmente via e link: <https://www.ua.aw/events/documentary-dande-di-aruba/>

Orario: 6:00 pm – 8:00 pm
Dialuna: 28 di maart, 2022

Entrada: gratis



Prome Minister a forma parti di conferencia di Nacionnan Uni REPRESENTACION DI HENDE MUHER NA NIVEL DI TOMA DI DECISION TA NECESARIO ORA TA TRATA EFECTONAN DI CAMBIO DI CLIMA

Prome Minister di Aruba a expresa di ta honra pa hunto cu Minister di Educacion, Cultura y Ciencia di Hulanda sr. Robbert Dijkgraaf pa representa Reino Hulandes den e conferencia. Esaki tabata e di 66 sesion di e “Commission on the Status of Women” y e conferencia a enfoca riba igualdad di genero y empodera hende muhe y mucha muhe den contexto di cambio di clima, medio ambiente y maneho pa reduccion di riesgo pa disaster.

Pa añanan largo, Hulanda, Aruba, Curacao y Sint Maarten a bataya e elementonan di horcan den region Caribense y

inunadacionnan. Awe den e conferencia paisnan a bini hunto pa atende un di e reto di mas grandi di e epoca cual ta pa atende cu e crisis climatologico y su consecucionan, Prome Minister a expresa. E urgencia ta grandi y ta creciendo mas y mas.

Premier Wever - Croes a sigui bisa cu recientemente rapport di Intergovernmental Panel on Climate Change (IPCC) a indica cu algun region y grupo ta wordo impacta mas cu otro, door di cambio di clima. Realidad ta cu e mundo no ta igual y e cambio di clima ta amplificando e desigualnan aki. Esaki tin consecuencia pa bida y existencia di ser humano rond mundo incluyendo islanan Caribense cu

ta directamente wordo menasa door di efectonan di cambio di clima.

‘Mi ta reconoce e efectonan cu esaki tin tambe riba muchanan muhe y hendenan muhe ora cu un comunidad ta den crisis. Pa motibo cu e peso di entre otro di cuida ta bira mas hopi riba e grupo aki.’

Notabel ta cu hende muhe no ta conta cu suficiente representacion na nivel di toma di decision ora ta trata e tema di cambio di clima. Premier Wever - Croes a expresa cu lamentablemente na Nacionnan Uni solamente 33 por ciento di e posicionnan di decision riba cambio di clima ta encera hende muhe. Ta dificil pa spera di resolve



e retonan aki mientras cu mitar di e poblacion ta keda atras.

Concluyendo Prome Minister a expresa, den liña di cu no por laga niun hende atras, ta boga pa participacion igual den

procesonan di mitigacion di cambio di clima. Ademas ta para pa hende muhe obtene acceso igual na e informacion, finanzas y recursonan necesario pa responde na cambio di clima. “Nos ta den esaki hunto pues ban uni forza.”

Parlamentario Shailiny Tromp-Lee (MEP) a asisti na apertura di e Exposicion Caribbean Ties cu actualmente ta na Klooster di Imeldahof na Noord



Siman pasa Parlamentario Shailiny Tromp-Lee a asisti na apertura di e Exposicion Caribbean Ties cu actualmente ta na Klooster di Imeldahof na Noord. Despues cu Museo Arqueologico Nacional Aruba (MANA) tabatin e exposicion na nan localidad na Playa y despues na San Nicolas a logra hiba esaki Noord. Asina MANA kier sigui trece e exposicion mas cerca di comunidad di Aruba. Hunto cu Fundacion 1403 y Fundacion Kapel di Bethania, MANA a logra haci esaki posibel.

Caribbean Ties (Lasonan Caribense) ta un exposicion internacional temporario cu ta basa riba resultadonan di e proyecto di investigacion NEXUS 1492. Na 2019 MANA a haya e exposicion Caribbean Ties regala di Universidad di Leiden. E exposicion ta resultado di un proyecto investigativo, lidera pa Universidad di Leiden caminda a traha cu diferente instancia di varios pais den region di Caribe. E exposicion ta trata e colonisacion Spaño den Caribe cu a conduci na transformacionnan drastico di e practicanan cultural indigena.



Caribbean Ties ta muestra e papel cu e pueblonan indigena di Caribe a hunga den historia global. E historia di Caribe ta ser presenta for di un perspectiva di su prome habitantenan.

E exposicion a ser presenta na Hulanda, Aruba, Statia y otro islanan di Caribe di mes forma, esta cu varios tema. E temanan ta multiculturalidad, migracion, intercambio economico y social, cambio den comemento y creencia y futuro di pasado. E caracter educativo di Caribbean Ties a ser amplia cu produccion di 4 video cortico cu por keda mira durante e bishita na e exposicion.

Tromp-Lee ta indica cu e tabata presente na e

apertura na Playa y mas cu claro a asisti tambe na e apertura cu a tuma lugar recientemente na Noord. E ta gradici Fundacion Kapel di Bethania, cu actualmente tin un exposicion den Klooster di Imeldahof cu a brinda MANA e oportunidad pa haci esaki.

Fundacion Kapel di Bethania tin un exposicion na e mesun localidad. Un exposicion cu ta conta e historia di e parokia di Noord. Un exposicion cu Tromp-Lee a bishita ya caba 3 biaha y cada biaha ta keda impreciona. E localidad sigur ta uno cu ta trece un paz y tranquilidad y e exposicion riba su mes ta tremendo. Bo por disfruta di historia, recuerdo, arte y artefactonan religioso. Potretnan ta presenta

storianan di tempo di e soeurnan di e convento di Imeldahof.

Ambos exposicion ta bale la pena bishita. Spera cu e scolnan di Noord y otro organisacionnan por haci bon uzo di e oportunidad mirando cu e exposicionnan ta mas cerca di cas. E 2 exposicionnan ta habri riba dialuna, diaranson y diahuebs for di 8.30 a.m te cu 3.30 p.m y ta situa na e Klooster di Imeldahof na Noord. Tambe por yama pa organisa un bishita na tel 5828979. Dia di Himno y Bandera e ambiente na e Klooster tabata tremendo caminda famianan a siña hopi y por a sinta dushi den e hardin di e klooster. Un pabien na ambos organisacion pa tur esfuerso y trabounan realisa pa haci e exposicionnan aki posibel y accesibel pa pueblo.

Prome Minister Evelyn Wever-Croes: ENCUENTRO INFORMATIVO CU STUDIANTENAN DI IPA



Dialuna mainta, Gobierno a ricibi bishita di IPA incluyendo e 'exchange students cu ta na Aruba. Na e ocasion, Gobierno a brinda informacion na e grupo di hoben cu a muestra hopi interes den haya mas tanto informacion posibel. Normalmente, e encuentro aki ta tuma luga tur aña pero door di Covid a haci esaki dos biaha virtual. Prome Minister a expresa di ta contento cu e biaha aki un biaha mas, por a ricibi e studiantenan den persona atrobe cu ta haci e encuentro hopi mas agradabel. Prome Minister Evelyn Wever-Croes, Minister Endy Croes y Minister Geoffrey Wever a hiba palabra durante e encuentro.

Prome Minister a duna informacion di gobernacion en general, con e ta hinca den otro y kico ta e retonan cu

Gobierno ta enfrenta. Riba e tema di Covid a haya hopi pregunta y a rekiri hopi informacion y splicacion tambe di parti di Prome Minister especialmente tambe riba con Aruba ta bay recupera y reconstrui despues di e pandemia.

E studiantenan tabata tin hopi pregunta tambe riba e relacion cu Reino y e fiansanan cu Aruba a haya di Hulanda. Tambe riba medio ambiente hopi pregunta a wordo haci.

“Nos a comparti cu nan e vision di Gobierno. Nan ta bishita Gobierno y Parlamento tur aña durante nan estudio. Esaki sigur ta un oportunidad unico pa nos comparti e vision y tur locual cu nos ta haci den gobernacion pa Aruba”, Prome Minister a duna di conoce.



E meta ta pa ora regresa Aruba e pashent tin un bida nobo HOH y team di UMC un bes mas cu opcion pa transplante di riñon

22 di maart 2022: Desde aña 2004 HOH ta traha cu team di Amsterdam UMC pa haci posibel transplante di riñon. E team di AMC a bin Aruba e aña aki pa haci un bishita un mes mas despues di basta aña y na mes momento suministra informacion na pashent relaciona cu transplante di riñon. Dokter Romeo Kock, nefrologo di hospital, a duna di conoce cu un delegacion completo a bini Aruba pa un bishita di trabou consistiendo di diferente especialista hunto cu profesor Frederike Bemelman cu ta internista – nefrologo y alabes ta encabesa e programa di transplante di riñon na Amsterdam UMC.

El a bin c'un grupo di cinco colega pa mira e pashentnan y brinda informacion di transplante di riñon. Desde 2004 entre 40 pa 50 pashent a bay Hulanda pa transplante di riñon. Desde e tempo ey algun persona a haya riñon di un donante cu a fayece via Euro Transplant.

Tambe a manda pashent cu a bay cu nan mesun donante, esta den forma di un "levende donor" cu por ta un famia of un conoci cu a bay eyan pa duna e riñon.

Durante e bishita di e team di UMC a controla pashentnan cu tin duda y pa evalua hunto cu nan, si ta un bon idea pa haci un transplante. Profesor dokter Frederike Bemelman, internista-nefrologo, lider di e team transplante di riñon UMC, ta contento di por a topa cu pashent y tambe e enfermeronan. Di e forma aki por garantiza cu nos trahamento ta intensive mas ainda. Asina ey, un biaha mas, por actualisa e acuerdo di cooperacion cu tin cu HOH. Si conoce e caranan, ta mas facil pa comunica y sa por ehempel con a sigui cu e pashent. Tambe kico ainda mester pasa prome cu e pashent ta cla y despues di transplante pa sigui cu e cuido specialisa, den cual ta necesario pa mantene un contacto estrecho cu pashent y e dunadonan



di cuido.

Dokter Bemelman a splica cu sa pasa cu despues di transplante e pashent mester regresa Amsterdam pa un tempo, pa ricibi extra terapia. E meta ta pa na final ora di ta bek na Aruba, pa tin un bida nobo. E indice di exito di transplante ta hopi halto. Bisando esaki, nueve di dies ta bay bon cu e transplante, pero ta nifica cu desde trepan mester informan nan bon di tur e posibel

retonan cu por topa cu ne despues di transplante y pa purba evita esey.

Un transplante di riñon di un persona cu a fayece ta brinda un otro persona mas of menos diesdos aña mas di bida. E por bay largo of cortico, pero e calculacion ta diesdos aña. Mientras transplante di riñon di un donante na bida, por bay te diesochu aña. E resultado ey ta mas miho, pero mester mira bon si tur esey ta posibel.

Horacio Oduber Hospital ta contento cu e acuerdo di cooperacion estableci pa hopi aña caba cu Amsterdam UMC. Como un isla chikito cu recursonan limita, ta casi imposibel pa por ofrece tur tipo di cuido. Ta p'esey ta importante pa por conta cu sosten y cooperacion di institutonan grandi y renombra di Hulanda. Y tur esaki na beneficio di e pashentnan di riñon.

E formularionan di winstbelasting 2021 ta na caminda

Departamento di Impuesto a manda e formularionan di winstbelasting 2021 via post y su contribuyentenan lo ta ricibiendo nan pakete den e simannan venidero.

E contribuyentenan di winstbelasting ta empresanan cu status di persona huridico cu ta estableci na Aruba of den exterior y cu por tin entre otro establecimiento permanente na Aruba y e companianan di seguro.

E pakete ta contene un formulario di declaracion provisional (voorlopige aangifte) y un formulario di declaracion definitivo (definitieve aangifte) di aña 2021.



A.T.A. tawata anfitrión di periodistanan di Latino America pa 'Dia de Las Mujeres'.

Asina aki 'tambe' a duna realse na e forsa femenino local, den cuadro di Dia di Hende Muhe



Recientemente a tuma lugu e evento 'Dia de las Mujeres' na Papiamento Restaurant, unda A.T.A. a invita 12 periodista di Latinoamerica pa conoce mas di nos isla y conoce tambe 10 hende muhe impactante di Aruba. A brinda un programa bon balansa cu como "highlight" e encuentro special aki entre hende muhenan balente, local y internacional. E forsa femenino na Aruba ta algo cu A.T.A. ta resalta como parti di Aruba su posicionamento internacionalmente, e ta un topico pa resalta y ta resona y capta atencion.

Ronella Croes, C.E.O di A.T.A., a splica cu den e fase di recuperacion di turismo cu Aruba ta aden, e cobertura y un evento asina ta laga un sentimento hopi positivo atras. Tambe a enfatisa cu e meta di e evento tawata pa combersa riba e responsabilidad cu hende muhe tin den cargonan

di liderasgo y con Aruba a logra consolida su mes como un di e nacionnan cu tin un porcentahe halto di hende muhe den posicionnan clave.

Pa e evento aki a invita hende muhenan di Aruba representando diferente area y industria pa di e forma aki demostra nos hende muhenan y tur locual nan a logra y ainda ta logrando. E evento aki a conta cu presencia di su Excelencia Evelyn Wever-Croes; Prome Minister di Aruba, Ronella Croes; C.E.O. di A.T.A., Vicky Arens; Directora di Cas di Cultura, Thessaly Zimmerman; Miss Aruba y finalista den e top 10 di Miss Universe 2021, Nicole Hoevertsz; Secretario General di Comité Olimpico Arubano y Vice-Presidente di Comité Olimpico Internacional, Joyce Pereira; Doctor den Sociolinguística y co-fundado di Fundacion Lanta Papiamento; Lilian Prince; Presidente

Koningin Wilhelmina Fonds; Susan Arias; Empresaria y propietaria di Aruba Experience Cafe and Patisserie, Naline Heilbron; Empresaria Social y Propietaria di Habon Aruba y Erin Croes; Periodista y propietaria di Magic FM.

E atardi a cuminsa cu palabranan di bon bini y un introduccion cortico di parti di Sjeidy Dijkhoff-Feliciano, Communications Manager di A.T.A. sigui pa e introduccion di cada un di e hende muhe impactantenan di Aruba cu a conta un poco di nan mes, di nan funcion como tambe retonan cu nan por a encontra.

Despues Johana Santiago, PR & Communication Manager di A.T.A. Latino America a sigui cu un introduccion cortico di e periodistanan. Di Argentina tawata presente periodistanan di CNN en Español, Net TV, AM 1110 y Radio de la Ciudad. Di Colombia tawata presente periodistanan di Blu Radio, Caracol Radio y el Espectador. Di Chile tawata presente periodista di L'Officiel. Di Brazil tawata presente un grupo di periodista di e red, Women in Travel, Lado B Viagem, Porta de Embarque, Viaje na Viagem, Sundaycooks, Viajar é Simples y Expedia su blog na Brazil.

A laga 2 di nos invitadanan di Aruba sinta na cada mesa cu algun periodista y cada 10 pa 12 minuut a laga nan cambia di mesa pa asina tur hende por a logra combersa cu otro. Na final tur hende por a sigui e combersacion den e hardin di Papiamento Restaurant. E cobertura



internacional di e bishita lo ta sumamente beneficioso pa Aruba. A.T.A. ta

gradici tur dama pa nan contribucion valioso!

ANUNCIO

SETAR ta informa cu lo tin trabounan di mantencion riba **diahuebs 24 di maart 2022 di 7:30 am pa 4:00 pm.**

Bario afecta lo ta:

- Sero Patrishi (un parti)
- San Barbola (un parti)
- Modanza (un parti)

Nos disculpa pa cualkier inconveniencia.



Parlamentario Marco Berlis (MEP) parti 2: Klinker, brug y caretera tabata mas importante pa Mike Eman cu e ser humano E realidad crudo di nos situacion economico

Den mi articulo anterior mi a cuminsa splica pueblo con nos a yega den e crisis social economico actual. Permitimi sigui elabora cu hechonan alcaso y corecto con esaki a tuma lugar. Den e splicacion aki, pueblo lo compronde tambe e importancia di continuacion gubernamental. E principio aki ta hopi facil di compronde. Si ami laga un negoshi cu debe, e siguiente doño lo mester paga esaki. Asina facil e ta. Ora otro gobierno drenta e mester acapara cu e consecucionan di e maneho desastroso di Mike Eman. E consecucionan aki lo ser sinti pa nos yiunan y nietonan pa basta aña mas nos dilanti.

Ora cu gabinete Wever-Croes-1 a tuma over mester a acapara cu un realidad; No por a inverti loke kier a inverti den e area social, enseñansa, y otro areanan importante mas pasobra nos pais, nos hendenan, nos bienestar, a wordo hipoteca pa casi 80% di nos GDP. Kico esaki ta nifica? Cu di cada 1 florin cu drenta caha

di Gobierno, 80 cent ta bay na paga debe. Pues di e 1 florin ta resta nos 20 cent so pa maneha nos pais. Inversionnan mester a wordo corta pasobra nos pais no tabata tin mucho espacio mas pa haci prestamo pasobra AVP a laga nos cu CAFT, medidanan, y poco recursonan pa por a sigui cu inversionnan crucial cu pais Aruba tabata tin mester. Klinker, brug y caretera tabata mas importante pa Mike Eman cu e ser humano!

Na final di 2019 Covid a haci su entrada na mundo y na Maart 2020 Aruba a conoce su prome casonan. Aruba a bay den lockdown y pa varios luna a bay plat den tur sentido. Medidanan mester a wordo tuma pa sigura e bienestar di nos pueblo y pone e salud y bida di nos pueblo central. Despues di algun luna a cuminsa habri nos frontera poco poco, y a cuminsa ricibi algun entrada economico. Sin embargo, e impacto di e perde asina hopi entrada tabata devastador pa nos pais.

Pa prome biaha den historia di Aruba, nos a bay bati na porta di Hulanda. Si Hulanda no lo a presta nos 1.2 Biyon den e temporada aki, Aruba lo a conoce un desaster y un realidad ainda mas scur! Henter e aparato publico no lo tabata tin placa pa paga gastonan, ni salario di niun hende, y e mercado internacional no lo a presta nos mas pasobra nan no lo tin garantia pa haya nan placa bek. E prestamonan di Hulanda e impulsa nos debenan y a haci nan 115% di nos GDP. Den otro palabra: Impagabel!

Pesey awor tin tanto exigencia, control y cortamento na nos pais. Aki ta unda e realidad di e maneho desastroso di sr. Mike Eman ta morde nos como pais! Den crisis nos tabata tin mester 1.2 biyon pa keda cu nos cabezas riba awa. Nos lo por a acapara esaki facilmente si nos no a wordo hipoteca cu orguyo te cu casi 80%. Nos lo por a fia facilmente y sin tanto medida, si no a hipoteca nos cu orguyo. Sin embargo e ta un



realidad cu nos mester biba cu ne y corda semper kende a posiciona nos pais pa disaster: sr. Mike Eman!

Mike Eman a haya Aruba resiliente y fuerte. No tabata tin crisis, Mike Eman a crea crisis pa Aruba. El a causa cu CAFT a bin. Mike Eman a bin haya Aruba contento, fuerte, yen di inversion. Awor e ta Aruba ta yen di hipoteca. Sin espacio drechi pa inverti den nos instancianan y economia. Awe sr. Eman ta pretende cu e tin e

derecho di reclama dicon prijs di gasoline ta subi, dicon no tin inversion, dicon tin pobresa, dicon ta corta tur caminda. E respuesta di tur esakinan ta facil pa compronde awor: POBRESA = Mike Eman, CRISIS = Mike Eman. Awor cu pueblo ta compronde e realidad, tur hende por compronde mihor. E realidad ta crudo, duro y pakico nos ta unda nos ta. E solucion ta pa nos lora manga y traha duro pa Aruba por sali for si e situacion aki hunto.

Chauffeur a haya rijverbod y e como tambe e dama cu tabata cun'e nan mester a cana bay cas

Diabierna madruga a drenta informe di cu tin un un Hyundai Accent beige cu a core basta malo y polis a logra topa cun'e pabao di rotonde Cumana.

Ora cu polis a bay atende cun'e a descubri cu e chauffeur ta bao influencia pero no suficiente pa detene pero si suficiente pa dun'e un "rijverbod" of sea prohibicion pa maneha auto pa 8 ora.

Polis a para e auto eybanda mes y a bay cu e yabi auto te ora cu oranan pasa!



Prome Minister Evelyn Wever-Croes:

Capitulo 1 di Relato Anual 2021:

PROME MINISTER TA AMPLIA RIBA DIFERENTE TAREA Y COMISION CU TA CAY BOU ASUNTONAN GENERAL

Otro siman tin tratamiento di presupuesto den Parlamento. Dialuna Prome Minister den conferencia di prensa di Gobierno di Aruba a presenta e Relato Anual 2021 di su ministerio na unda cu el a amplia riba e trabounan cu a wordo haci enfatisando riba 3 capitulo: Asuntonan General, Integridad y Organisacion Gubernamental.

E capitulo di Asuntonan General ta un capitulo hopi extenso caminda cu diferente tarea y comision cu ta cay bou asuntonan general ta wordo describi. Den e capitulo aki Prome Minister ta duna un descripcion di e tareanan cu a wordo haci den cuadro di Covid, calamidadnan en general, crisis migratorio di Venezuela y e efectonan riba Aruba, e problematica di asilo tambe y e cifranan di asilo. Tambe ta toca den cuadro di e crisis migratorio di Venezuela, e asistencia cu Aruba a haya di Hulanda y kico a haci cu e fondonan di Hulanda pa cu e crisis aki.

E tema di comunicacion tambe ta wordo amplia y e forma con Gobierno ta comunica. E intencion di Gobierno ta pa bin

cu un media raad cu ta un conseho pa yuda Gobierno, cu ta completamente den man di esnan den media. Esaki ta pa crea e forma pa Aruba completo por haya un miho calidad di media aki na Aruba.

Den e prome capitulo di e Relato Anual ta amplia riba e relacionnan di Reino y Landspakket, COHO y RAFT y e cambianan cu Gobierno a logra introduci na 2021 den e negociacion cu Hulanda.

Ta elabora tambe riba eleccionnan di 2021. E coordinacion di esaki ta un tarea hopi importante cu ta cay bou di ministerio di Prome Minister. E no ta un secreto cu esaki ta un di e eleccionnan cu mas a wordo discuti den historia di nos pais y tur a wordo finalisa cu decisionnan di hues. Tur esaki ta wordo trata den e Relato Anual.

Relacionan Exterior y kico ta nos maneho ta un punto importante cu ta inclui den e relato di 2021. Con importante Colombia y Merca ta den esaki. Ta menciona SDG y maneho di genero. Tambe tin un capitulo di seguridad nacional di nos pais y kico tur a haci riba e tereno aki



y cu por ta di interes pa henter Aruba pa haya sa.

Veiligheidshuis ta un plataforma caminda cu diferente institutonan social y hudicial ta traha hunto pa yuda atende cu e temanan social y hudicial mas critico na Aruba. Prome Minister ta presidi e veiligheidshuis aki y den e relato ta duna tambe un recuento di e tareanan.


Raad voor Ouderen tambe tin un recuento di kico a haci prome cu el a wordo traspasa na Minister Arends.

Asina tambe tin diferente comision cu Prome Minister a institui

durante añanan y den e Relato Anual 2021 ta duna recuento riba esakinan. Entre otro; Commissie Versterking Democratisch Bestel cu ta e comision cu ta yuda fortifica nos sistema democratico; Commissie Sexueel Misbruik Minderjarige, con nos por haci pa no tin gap entre institutonan y ministerionan ora ta trata di abuso sexual di nos muchanan; Comision di Inclusion di personanan cu necesidadnan special. Nos ta papia akinan di hendenan special cu tin habilidad special, caracteristicanan special y loke nos kier ta inclui nan den tur desaroyo cu

tin den nos pais; Comision riba tereno di plataforma di e problematica di cacho riba caya, esaki tambe a wordo pasa pa Minister Arends.

Relato Anual 2021 di Prome Minister ta publica riba diferente plataforma online pa asina pueblo henter por lesa y studia esaki. Por haya esaki riba e website 'Prime Minister's Office' pmo.arubagov.org of por solicita pa ricibi e relato anual via un link via email. Por haci esaki via pagina di Facebook Gabinete Wever-Croes.



KPA ta anuncia temporada di campamento

FECHA Y REKISITO PA CAMPAMENTO 2022

MACUARIMA, ARUBA: Relaciona cu Semana Santa caminda cu nos ciudadanonan tin e custumber di bay campa, Altocomisario di Polis Interino Sra. Irma Gordon ta haci un yamada fuerte na nos campadornan pa tene cuenta cu e condicionan bao di cual e permiso ta wordo otorga.

E fecha riba cual nos campadornan por cuminsa campata Diadomingo 10 april 2022 pa 12:00 di merdia. Kiermen riba e fecha y ora stipula ta permiti pa pone trailernan y tentnan riba nos beachnan. Tur obheto cu wordo poni prome cu e fecha y ora stipula lo wordo kita pa polis. E ultimo dia di campa lo ta dia 24 april 2022.

Despues di campamento tur obheto mester wordo kita for di beachnan. Si esaki NO sosode polis lo kita esakinan riba gasto di e campador. Un yamada ta bai na un y tur pa mantene nos beachnan limpi. Deposita tur desperdicio den bari di sushi of den saconan di plastic.

Ultimo dia pa entrega peticion pa campamento ta diaranson 23 maart 2022 entre 08:00 pa 11:30 mainta y entre 01:00 pa 04:30pm Extra condicion a wordo añadi na e permiso. Tene cuenta cu e siguiente condicion cu nos ta splica aki bao:

1. Ariba e santo blanco di e beachnan bao ningun circunstancia ta wordo permiti pa haci B.B.Q., na otro parti solamente por haci B.B.Q. cu B.B.Q. pit di gas.
2. Tent y trailernan cu ta wordo uza pa campa mester ta den bon condicion. Nan mester wordo poni a lo menos 10 meter di e orilla di lama y nan mester wordo poni por lo menos 5 meter for di e caminda publico. No cumpli cu e regla aki, polis lo kitanan.
3. Bao ningun forma ta wordi permiti pa reserva tereno pa campamento.
4. Tent, trailer y otro obhetonan cu ta wordo uza pa campa no por wordo poni riba otro lugarnan cu ta e lugarnan cu ta destinan pa esakinan y cual lugarnan a wordo destina pa Gobierno.
5. Den e tentnan/trailernan



mester tin suficiente recursonan pa loke ta trata dunamento di prome auxilio. (E.H.B.O.)

6. Ta prohibi pa pone na tent/tráiler, obhetonan of plachinan cu no ta cuadra cu moralidad.
7. E campamento mester sosode conforme e condicionan bao di cual e permiso a wordo otorga.
8. Ta prohibi pa core cu vehiculonan di motor, bicicleta, cabay y garoshi riba nos beachnan y principalmente na lugarnan caminda ta destina pa publico.
9. Ta prohibi di pega candela riba nos beachnan.
10. Ta prohibi di bende cuminda, softdrinks, mixdrinks, of cualkier otro tipo di articulo ariba beach sin permiso.
11. Musica por wordo toca solamente for di den e trailer of tent den siman te 10:00 p.m y den weekend te cu mey anochi di tal manera cu otro campadornan no ta wordo molestia. E uzo di sound system/emplifiers etc. ta wordo permiti solamente si otro campadornan no ta sinti molester di esakinan.
12. Ta prohibi pa kap mata, sin permiso.
13. Ta prohibi pa core cu boto y pa ankra esaki den e zwemzone tambe ta prohibi pa mara boto na boeinan cu ta destina pa scheepvaart.
14. Ta prohibi e uzo di pallet y carton riba beach. No cumpli cu e regla aki polis kita esakinan.
15. Ta prohibi pa uza e beach of e palo di coconan como toilet.



16. Ta prohibi pa tin cabay y cacho riba beach.
17. Ta prohibi pa e campadornan uza e hutnan pa nan campa, nan ta wordo laga liber pa e personanan cu ta bin pasa dia.
18. Bao ningun circunstancia mag di susha e beachnan. Boternan kibra of splinter di glasnan no mag di wordo laga atras riba beach, ni tampoco pa tira esakinan den lama. Esaki ta conta pa desperdicio tambe.
19. E permiso no mag di wordo pasa pa otro persona.
20. E poseedo di e permiso mester tin esaki den su tent/trailer na un caminda visibel pa polis.
21. E poseedo di e permiso mester tene cuenta cu e tin solamente derecho riba e lugar di campa durante e tempo cu efectivamente e ta campando, prome cu esaki bo no mag di reserva, marca, pone cabuya ect.
22. E poseedo di permiso ta keda

responsabel pa cualkier daño na otronan debi na existencia di su tentnan/trailer of otro objeto.

23. Indicacionnan di polis duna na interes di orden publico y seguridad di persona, bienes y basa riba moralidad mester wordo sigui estrictamente.

24. Ta prohibi pa usa e hutnan pa campa, nan ta keda liber pa e usuarionan den dia.

25. Esun cu no actua conforme e condicionnan bao di cual e permiso a wordo otorga ta wordo considera di a actua sin permiso. E permiso e ora ey ta wordo revoca y bo por haya un multa.

Un recordatorio pa tur campadornan cu e ultimo dia pa haci peticion pa campa ta dia 23 maart 2022. Sigui tur reglanan y sigur bo lo pasa un temporada dushi. Nos di Cuerpo Policial Aruba lo controla durante campamento na tur parti di nos isla.

GLEMBERT CROES TA PUNTA DEDE SIN WAAK E AVALANCHA DI DEDE CU TA MUSTRA RIBA SU PERSONA!

"Zoals de waard is vertrouwt hij zijn gasten" ta un dicho masha conoci cu ta duna un bon splicacion di e comportacion di minister Glembert Croes den e caso di Dimas. Recientemente nos por a tuma nota di un Tsunami di acusacionnan di minister Glembert Croes contra e directora di Dimas. Ta di spera cu pronto e señora drechi aki, cumi tabata tin e honor di a traha cun'e, bay Corte pa desbarata tur e atakenan cu e minister a lanta contra e señora integro y intachabel aki. Ta hopi straño cu ningun minister den e gobierno aki a lanta defende e empleado publico integro aki. Contrario cu den pasado nos a denuncia un consejera principal di un minister y mi a wordo menasa cu lo hiba mi corte, wel te awe mi ta warda! Awe tur ta keto! Esaki ta INTEGRO? Ta tristo pa scucha un minister acusa e persona aki sin ningun pero ningun prueba. Si tanto cos segun e minister e señora aki a hasi, dicon no a bay Ministerio Publico? Ainda mi ta corda dia cu e mesun minister aki a acusa e management team di Labor, cu btw e mes a apunta, di ta hasi nan mes culpabel na corrupcion! Unda e investigacion aki a keda? Of ela wordo malamente "teruggefloten"?

E minister aki ta conoci cu kier duna instruccion hopi biaha telefonicamente pa hasi cosnan incorrecto, pero ora cu e ambtenaar bisé cu

ta riba su instruccion e ta hasie, e kier rabia. Mesun modus operandi cu su mucha mandá Mario Wever ta hasi. Mi ta spera cu no bin nenga esaki. Si bo kier comete corrupcion, "be a man, not a cacarouch", hasi'e bo mes! Pero e ta cobarde pa hasi esaki. Ta p'esey por ehempel ela pone un hala di hendenan den Labor cu no tin ni e preparacion ni tin e capacidad ni e curashi pa para cos y tur esaki pa e por usa nan su antoho. Nan ta simplemente hasi loke e minister bisa nan pa hasi, sin cu nan ta conciente cu nan tambe por ser poní responsabel pa e actonan di e minister.

Esaki elo kier cu Dimas tambe? Dimas a bin na 2006 pa e simpel motibo pa caba cu e corrupcion cu tabata tin den full e cadena di permissiologia. Den cuadro di esey y pa evita un KB, dia 6 di februari 2006 gobierno di Aruba di e tempo ey a firma un protocol cu Hulanda. E esencia di e protocol aki ta pa evita cualkier corrupcion y a bin cu un departamento cu lo tin tur e "safety valves" aden pa EVITA corrupcion! Y nos a logra!! Y esun cu a "trek" e esaki ta sra. Kathy Paskel!! Nos a pone un Dimas na unda corrupcion y excepcion a pasa pa pasado! Despues di fin di 2009 a bin un fin na esaki na unda a cambia maneho y a pone Mario Wever pa hasi e trabow sushi. Pakico? Sra. Paskel hamas lo presta su mes pa hasi

esaki y awor e gobierno actual cu tin e pretencion di ta integro, ta demonstra todo lo contrario. Awor ta pone Labor cu Dimas den un man. Awor e caminda ta hanchu habri pa un Minister hasi y deshasi. E minister su mes lo firma pa e "toetsing" na e mercado laboral y despues e mes lo firma e permiso di trabow y estadia. Tur esaki sin cu ningun otro hende por mira PASÓ e so tin aceso na e

sistema digital! Na unda e por "sjoemel" na su antoho! Den e caso aki no mester ni p.e. "onthefing". E mes ta FIX tur cos! Y sin ningun hende sa! Of via oficina di abogado amigo! Esaki tambe ta INTEGRO? Ta obvio cu minister Glembert Croes no kier niun "POTTEKIJKERS" rond di dje, solamente harlequin! Ta p'esey e minister ta asina hambrá pa haya e ICT bow di dje directamente y niun otro hende! Dicon esnan cu ta labora den e "vreemdelingenketen" no por tin aceso na esaki? Of e so kier tine pa e por cambia number of number? Ki miedo e tin cu p.e. Guarda nos Costa tin aceso na e sistema? Ta p'esey e hefe di Guarda nos Costa a mande un "brandbrief"? Dicon no ta publica e carta ey? Den e sistema actual di Dimas por sa mesora ken a mishi cu e informacion y si a hasi cambianan den esaki. Ta miedo e tin pa e of un di su "MARIONetanan" wordo gara? Dicon tin miedo pa por ehempel interconecta TUR departamento



cu otro. No ta esey ta e obhetivo di e digitalisacion di nos sistema gubernamental? Y dicon den e asunto di permissiologia kier hasi otro?

Pa colmo ministernan, parlamentarionan y fanaticonan ta apoya e postura inaceptabel di Sr. Glembert Croes cu ya a yega di traiciona e pueblo caba den e caso di Racetrack! Diabierna ultimo a celebra dia di Himno y Bandera. Cuanto di nos a para keto si enberdad tabata tin algo pa celebra? En todo caso mi persona a reflexiona masha hopi pasó ya caba nos Parlamento a bira un "pispaltje" di Den Haag (cu COHO) y cu e maneho contra e ARUBIANO aki, no tin nada di celebra si nos mes no lanta para e caba cu e bagamunderia aki. ARUBIANO, UNDA NOS TA BAI???

Chofer cu a huy despues di accident a wordo deteni despues

Dialuna mainta un oficial di e brigada motoriza y a bay atende e accidente ora ela bisa un di e partidonan involvi pa e hala su auto un banda pa trafico por sigui e chauffeur aki a primi trot bay laga, pero e polis a logra wak e number di auto y a not'e y a pas'e pa e otro patruyanan. Un patruya di Oranjestad a

bin haya e auto na e adres registra na Rooi Lamuchi y a haya e chauffeur, na yegada di e polis cu a duna instruccion pa e para a yega y a detene mesora y a bay warda di polis cun'e sin comprension ya cu ela viola e confiansa y orden di e oficial. Mientras e auto mes a ser confisca.



Minister di Cultura Xiomara Maduro ta gradici y felicita pueblo di Aruba:

Nos talentonan local a briya durante manifestacion cultural Himno y Bandera

E pueblo a acudi masal pa festeha riba na Plaza Libertador G.F. Betico Croes



Diahuebs ultimo a tuma luga e Manifestacion Cultural Dia di Himno y Bandera riba Plaza Libertador G.F. Betico Croes. For di oranan di atardi e pueblo a cuminsa yega plaza caminda por a pasa na un total di 40 tent cu tabata tin benta di cuminda crioyo, cos dushi y artesanía mientras cu tabata tin entretenimento musical di Caha di Orgel y despues steelpan. Masha danki pa forma parti di e bunita anochi aki. Despues di yegada di e mandatario- local y di exterior, parlamentario- local y di exterior y demas invitadonan local y di exterior, maestro di ceremonia Melvin Garcia a yama tur invitado un bon bini na e Manifestacion Cultural Dia di Himno y Bandera 2022, e celebracion di 46 año di inauguración di Nos Himno y Bandera. E programa a inicia cu entrada di nos bandera door di nos deportista Sarah-Quita Offringa, 19 biaha campion mundial den windsurfing y a ser acompaña pa 15 atleta di Club di Gihae gymnastics Aruba, sigui pa nos himno nacional presenta pa Arubress. Masha danki na nos deportistanan y na e grupo di trompetistanan uni bao direccion di sr. Franklin Granadillo.

Pa Minister di Finansa y Cultura Sra. Xiomara Maduro, anfitriona di e evento, tabata un

honor y orguyo di por a dirigi palabra na tur esnan presente den cuadro di celebracion di nos Dia Nacional, Dia di nos Himno y Bandera.

E programa di anochi tabata yena cu diversidad den talento, musica, canto, baile, poesia y hopi mas. Un danki special na nos talentonan local cu a presenta y a haci nos Manifestacion Cultural Himno y Bandera un show espectacular. Gradicimento na gruponan di baile mini NTG y NLG, pa nan coreografia y creatividad di baile di nos hoben- y adultonan, Club di Movimiento pa nan presentacion di arte y baile clasico, Pierewietje y Flash pa nan baile folklórico.

Un danki ta bay tambe na e ganadonan absoluto di Festival Un Canto pa Aruba su Himno y Bandera, e duo Ruth Gaarie y Stephanie Gravenhorst cu nan cancion titula: “Ora bo wak na shelo”, ganado categoria 13 pa 17 año Gismery Linarez cu a presenta su cancion: “Obra di Dios”, ganado di 2do luga categoria 13 pa 17 año, e duo forma pa rumannan Daniella y Gabriella Boasman, cu a presenta e cancion “3 Palabra, Nos Bunita Aruba”, pre-hubenil 10 – 12 año, Stephanie Quant ganado categoria 10 pa 12 año, cu e cancion un tumba “Bo mester sinti pa Aruba”, ganado



2do luga categoria pre-hubenil 10-12 año, e hoben John-Maynard Wever cu a presenta su cancion un wals “Ta abo mi ta stima”,

Aruba por a disfruta tambe di e presentacion di agrupacion musical Sabor Crioyo bao direccion di Jason Kelly cual a acompaña tambe J-vyön Besselink cu un tumba titula “Dilanti e ta bay, push’e”,

despues cu un dushi danza titula “Mi amigo cododo” presenta

pa Jaymerson Kelly, 2do luga categoria 7 pa 9 año Festival un Canto pa Aruba su Himno y Bandera.

Palabra di danki ta bay tambe na dos hobennan Kiziah Trimon y Raynold Kelly cu e cancion “Color di speranza”, otro impactante presentacion, e letranan di cancion adapta na Papiamento pa Sra. Maybelline Arends-Croes. E presentacion a ser acompaña pa grupo di atletanan cu movecion di señanan di man.

Continuacion pag 15

Continuacion di pag. 14



E programa di anochi tabata varia cu nos talentonan local y Joan Danies y Daylan Krozendijk a presenta un poesia ritmico den forma teatral. Un presentacion cu a capta hopi atencion y cu tabata algo diferente tabata e show di acrobacia di Daniela Sanchez y Hilyann Croes di Aerial Dance & Performance. Masha danki pa un tremendo presentacion.

Nos artista local Michelangelo Koolman acompaña pa un mini-banda a deleita e publico cu dos cancion di Aruba, e prome cancion tabata den e bos di Pearl Dumfries cu a presenta e cancion “Ta na Aruba”, e segundo cancion tabata presenta pa Michelangelo Koolman cu e cancion “Aruba mi ta di bo so”. Ambos cancion a ser acompaña pa e duo Marcie y Mirienne di Xanadu Dancers. Masha danki pa e bunita presentacion.

Mester menciona cu e presentacion di Edward van der Biezen y Jurick Salomon cu e tumba titula: “Mester por”, a resona bon y a trece mas ambiente, cual presentacion a wordo acompaña pa grupo di baile Youth Kids in Action, masha danki tambe. E anochi a resalta e variedad di nos caracteristicanan den arte,

baile, musica y poesia, un danki di curason na cada un di nos artistanan y deportistanan local cu nan tremendo presentacion. Aruba tin talento cual nos tur ta orguyoso di cada uno. E anochi a sera den grandi den un fiesta total cu presentacion di Atanero & Friends, nos artista local cu ta celebrando 30 aña den e mundo di farandula, cu a duna un mini-concierto presentando diferente di su

temanan pegahoso di infancia te na grandi, kende a wordo acompaña pa The Popcorn Dancers y Carnaruba Costume Group. Masha danki pa clausura e evento aki den un ambiente formidabel. Ta momentonan inolvidabel di mira un plaza completamente yen, un anochi cu Aruba a briya y a celebra den grandi y yen di orguyo su Dia di Himno y Bandera. Masha danki Aruba pa bin hunto pa nos biba y stima nos cultura.

Por ultimo Minister di Cultura Xiomara Maduro ta gradici Comision Celebracion Dianan Nacional, Departamento di Cultura y tur patrocinadonan pa nan cooperacion pa haci e manifestacion cultural un fiesta di pueblo espectacular.



Durante reunion cu cuerpo consular di aruba PROME MINISTER TA ENFATISA RIBA E IMPORTANCIA DI PAZ Y COOPERACION PA PROGRESO DI UN Y TUR

Prome Minister Evelyn Wever - Croes a reuni diabierna 18 di maart cu Asociacion di Cuerpo Consular di Aruba. Pa cual Prome Minister a tene un discurso den cual a wak bek riba e retonan cu tabatin durante ultimo tempo, e retonan cu tin actualmente na nivel mundial y ademas a reconoce e importancia pa Paisnan sostene otro den temporada dificil.

Premier Wever Croes a inicia su discurso cu un splicacion cortico di historia di Aruba su Himno y Bandera. 46 aña pasa, 16 di maart 1976 durante e di 18 sesion Parlamentario di Aruba, a dicidi cu riba 18 di maart 1976 lo oficialisa Aruba su prome Dia Nacional di Himno y Bandera. 10 aña despues riba prome di January 1986, Aruba a ricibi un status autonomo den Reino Hulandes, "Status Aparte". Y Desde 10 di october 2010 Curacao y Sint Maarten tambe a ricibi un status legal den Reino Hulandes.

Te hasta como paisnan autonomo den e constitucion democratico, 'asuntonan di exterior' keda un asunto di Reino. Pa e motibo aki, diferente aspecto importante ta wordo discuti regularmente na nivel halto entre e 4 Gobiernonan entre otro: E pandemia di Coronavirus, Cambio di clima y desasternan natural y e impacto di e situacion entre Rusia y Ukraina cu a inicia cu e invasion di Rusia na Ukraina dia 24 di februari.

E Pandemia di Coronavirus
Mundialmente 6 miyon persona a fayece a causa di coronavirus of un di e variantenan. Na Aruba 212 persona a perde nan bida door di e pandemia COVID-19. Gobierno di Aruba a traha incansablemente pa mitiga e efectonan di e pandemia. Sinembargo, e impacto primordialmente riba e economia y riba e sistema medico ainda ta wordo sinti. Gobierno su strategia di vacunacion y sosten cu a ricibi di Gobierno Hulandes den provee e vacunanan rekeri pa e isla tabatin un rol importante den e recuperacion, Prome Minister a expresa.

Segun cifranan ta indica, 82% di e poblacion 18 aña bay ariba, a ricibi e prome dosis di vacuna y 78% a ricibi e di dos vacuna tambe. Actualmente ta tratando pa aumenta e cantidad di personanan cu ta tuma e booster shot tambe, riba 40%.

Awe, dos aña despues di e lockdown of cierre di frontera, tin solamente 40 caso activo na Aruba y no tin pashent cu Covid den cuidu intensivo na Aruba tampoco.

Ta un hecho lamentabel cu na cierto parti di mundo, gobiernonan ainda ta lucha cu e efectonan di e pandemia debi na e diferente variantenan di e virus. Pa cual ta comparti e sentimento den e lucha aki cu nan. "Pa bringa e virus mundial aki, nos mester para hunto".

Cambio di clima y desasternan natural

E tema di cambio di clima y desaster natural tambe ta un punto di preocupacion. Turismo ta e pilar economico di Aruba. Mas cu 70% di e industria turistico ta depende directamente di e mercado Mericano. Tin un cantidad di companianan y inversionistanan Americano cu ta inverti den Aruba su economia, manera hotel, empresanan, restaurant y compania di contratista. A pesar di e pandemia, Aruba a keda un destinacion favorito pa hopi ciudadano Mericano. Meta di Aruba ta pa bira un destinacion deseabel y sostenibel, pesey bishitantenan y habitantenan ta wordo encurasha pa compromete na respeta, conserva, preserva y promove e isla door di un comportacion social y ecologicamente sostenibel. E meta aki ta parti di Aruba Tourism Authority (ATA) su enfoca nobo cu yama "Mi promesa na Aruba".

Gobierno di Aruba ta hopi consciente cu disaster por presenta na cualkier momento, sea ta un virus, un horcan, un temblor, inundacion of te hasta un tsunami. Mayoria di Paisnan den e encuentro a conoce esaki manera Brazil, Pero, Mexico, Merca, Francia, India y mucho



mas cu ta presente den e conferencia aki, Prome Minister a expresa.

Invasion di Rusia na Ukraina

E ultimo añanan tabata añanan cu hopi reto, manera indica anteriormente, awor conflicto arma tin e atencion di henter mundo.

Durante di e ultimo lunanan gobiernonan a enfoca riba escalacion di conflicto na frontera di Ukraina y Rusia, y a insisti riba e necesidad di diplomacia y dialogo. E comunidad y nacionnan a haci yamado na Rusia pa hunto sondea un ruta diplomatico for di e crisis aki. Esaki te ainda no tabata exitoso te unda cu ta na altura di dje.

Gobierno di Aruba ta balora

tur representante di exterior pa a tey pa Aruba durante momentonan di calamidad y cu a comproba di ta instrumental den e recuperacion economico di Aruba. 'E cuerpo diplomatico y consular ta e wowonan y oreanan di sector priva, banda di asisti den proteha e nan ciudadanonan na Aruba, door di esfuersonan, e sector priva por haya oportunidadan empresarial nobo segun nan ta manifesta na Aruba y/of den e paisnan cu ta representa.'

Concluyendo Prome Minister a expresa e importancia pa tene na cuenta cu paz, cooperacion y resiliencia ta necesario pa logra progreso pa un y tur y no tin duda cu lo persevera y ta exitoso.



SAN NICOLAS A CELEBRA Y HOMENAGEA DIA DI HIMNO Y BANDERA



SAN NICOLAS: Ya pa 46 aña, Aruba ta celebra 18 di maart como e dia pa celebra himno y bandera di nos pais y e aña aki San Nicolas tambe a unifica su es na e celebracion aki riba e rotonde di FTA San Nicolas cu un obra di Arte di artista local Robby Solognier..

Den presencia di entre otro Palamentario Alvin Molina, San Nicolas Business Association, Aliansa Pariba di Brug, comerciantenan di San Nicolas, amigonan y un gran parti di famia, Tito Bolivar, director di ArtisA a hiba palabra gradiciendo pa e oportunidad di trese tur forzanan hunto no solamente pa celebra e fecha di conmemoracion na e prome paso tuma na 1948, na unda un mocion a ser entrega na Su Mahestad Reina Juliana, pa autodeterminacion di e pueblo Arubano, pero tambe pa pone enfasis riba e promesanan haci di haci y mantene San Nicolas e Art Capital of the Caribbean. E bandera a wordo hisa dor di e hoben Loghan Mi-

chael Steenvorde di Grupo di Scouting Casibari, mientras cu e himno a ser

canta dor di e ganadora di Concurso di Himno & Bandera 2022 Gismary Linarez.

Caha di Orgel Istela a deleita un y tur y San Nicolas Alliance tambe a duna nan presentacion.

Un gradicimento na Departamento di Cultura di Aruba pa nan colaboracion. Na tur cu tabata presente y asina ta pone un paso mas den e direccion di celebracion cu lo ta tuma lugar un biaha mas na 2022. Un di e grandinan sigur lo ta Aruba Art Fair pa asina sigua e continuacion di embeyecimento di e cayana di San Nicolas, e murayanan y garantiza cu



e fluho di bishitantenan lo keda crese cu cada dia cu pasa.

San Nicolas ya no ta e forgotten City, awendia e ta

tumando pasonan serio pa mantene su titulo como e Art Capital of the Caribbean y e centro di Arte y Cultura di nos pais.



CAMBIO Ariba e Landsverordening Beperring TABAKSPRODUCTEN (AB 2016 NO. 41)

Dia 26 di oktober 2021, Minister di Salud Publico Sr. Dangui Oduber tabata den Parlamento di Aruba

pa trata e ley di "Landsverordening tot wijziging van de Landsverordening beperking tabaksproduc-

ten". E ley aki a wordo aproba unanimamente. Dia 2 di mei 2022, e ley aki lo wordo implementa. E cambionan ta: 1. Artículo 2: ta prohibi pa huma den luganan publico 2. Artículo 2A: ta prohibi pa huma den transporte priva ora cu tin menor di edad den auto 3. Artículo 3: doño di trabou ta responsabel pa proteha su empleadonan for di huma di sigaria durante orario di trabou y riba tereno di trabou 4. Artículo 4: ta prohibi pa huma den tur forma di transporte publico 5. Artículo 5: ta prohibi

pa bende of duna productonan di tabaco den cierto instancianan 6. Artículo 6: ta prohibi pa bende of duna productonan di tabaco na personanan bou di 21 aña 7. Artículo 6A1: ta

pribi pa parti productonan di tabaco gratis 8. Artículo 6A2: ta prohibi pa bende sigaria los. Sigaria mester wordo bendi den paki cera y sealed.



PUEBLO A HAÑA SU PEN BEK

Pa kualkier informacion
solodipueblo@gmail.com
of
☎ 585-9500

Exposicion 'Expresion y fantasia riba tela'

Ex-docente di formacion artistico y Artesano Olivia Benschop-Erasmus ta presenta su exposicion na Biblioteca Nacional Aruba. Apertura ta diaranson dia 23 di maart 2022, 5or y mey pa 7or. E exposicion ta keda habri te dia 8 di April na biblioteca na Playa.

Sra. Olivia ta presenta obranan inspira riba e biyetenan nobo di Aruba. (The new 2019 florin banknotes series) 5 obra riba tela di cortina (textiel) cu un composicion propio masha special y unico. Materialnan cu a usa ta verf, pinturanan aplica cu awa, stift di awa, potlood di color cu por aplica cu awa, Wasco combina cu awa. Esaki ta un coleccion di obra cu sra. Olivia a traha ariba den periodo di e pandemia. Sra. Olivia Benschop-Erasmus (50) ta ex-docente y a traha na diferente scol na Aruba durante su carera manera Colegio Arubano y Instituto Peda-



gogico Arubano (IPA) y Scol di enfermera na hospital y tambe Colegio Arubano na San Nicolas. For di chikito sra. Olivia tabata gusta Arts & Crafts y a gradua como docente

na Utrecht na 1972. Sra. Olivia a duna les di pintura y Obra di man. Awor cu sra. Olivia ta pensionado e ta dedica mas tempo na arte y proyectonan creativo.



Jourde Klaber Brons y Joshua Klaber Oro na Texas USA

DIASABRA DIA 19 DI MAART 2022 E RUMANNAN KLABER A PARTICIPA DEN E 2022 DALLAS FORTH WORTH OPEN CHAMPIONSHIPS



rond tabata Luis Orozco di USA.

pero esaki no a bay signun plan. Joshua Klaber a habri cu scopnan pa cabes. Gabriel Simon no a laga pa perde y a sigui busca su puntonan. E prome rond a termina cu un score di 7-5 pa Joshua Klaber. Den e di dos rond Joshua Klaber a sigui busca punto y e score a termina 17-5 pa Joshua Klaber. E ultimo rond Joshua Klaber a sigui e instruccionnan di su coach Monica Pimentel y Joshua Klaber a gana e pelea cu un score di 20-12 y a sali campeon den e categoria di adulto -58 kilo.

Joshua Klaber di -58 kilo a enfrenta su di dos campeonato bringando den e categoria di adulto. Joshua Klaber a topa cu Jimmy Duong for di USA y Joshua Klaber no a perde pa gana y a cuminsa bombardia su contrincante cu atakenan y e prome rond a termina 11-3 pa Joshua Klaber. Den e di dos rond Joshua Klaber a sigui cu e instruccionnan di su coach Monica Pimentel y e score den e di dos rond a termina 19-4. E ultimo rond Joshua Klaber a sigui bringa pa asina segura su victoria pa final y a logra tambe.

Den final Joshua Klaber a topa cu Gabriel Simon for di USA cu a bin tur motiva pa gana Joshua Klaber,

Diadomingo dia 20 di Maart e rumannan Klaber a bringa un biaha mas den e 2022 Dallas Fort Worth Open International Championship "(NON SANCTIONED)"

HOTLINE

744-0444

CAPT'E
Y MAND'E

Jourde Klaber a bringa den e categoria adulto di -63 kilo y a haña un bye y a topa cu Luis Orozco di USA. Den e prome rond ambos atleta a haña un strafpunt y e prome rond a termina 1-1. Den e di dos rond Luis Orozco a tuma e bentaha ariba Jourde Klaber cu un score di 5-1. Den e ultimo rond Jourde Klaber a lucha pero no tabata suficiente pa e por a gana e pelea y esun victorioso den final di e tercer



BATIDONAN DI FRUTA Y YOGHURT: PAKICO PREPARA NAN?

E batidonan di fruta y yoghurt ta alimentonan cu, corectamente inclui den dieta, ta capas di genera cierto beneficianan na nivel di salud. Sin embargo, un mal uzo di esaki por resulta negativo, vooral si ta comete eror en cuanto na nan preparacion.

Eligi bon e ingredientenan y nan combinacion ta resulta primordial. Dentro di un plan di alimentacion saludabel, casi tur e alimentonan por ta inclui.

Un di e clavenan pa garantisa e variedad di manera satisfactorio ta pa ta preciso den e cantidadnan di cada un di e productonan cu ta consumi.

Esaki, por supuesto, mester tene na cuenta na ora di consumi batido.

Catacteristica di e batidonan di fruta y yoghurt Dentro di e caracteristica di e batidonan di fruta y yoghurt mester ta destaca e presencia di probiotics y di antioxidante.

E promenan a demostra di ta capas di eherce un efecto positivo riba e microbiota intestinal, loke ta resulta den mehoracion pa salud en general.

En particular, contribui na mehora e funcionamiento di e sistema inmunitario y p'esey, ta disminui e riesgo di enfermedadnan infeccioso.

Di su parti, e antioxidantenan ta substancianan esencial pa neutralisa e produccion di radicalnan liber na nivel celular.

Di e manera aki, ta mantene un ekilibrio oxidativo, ta reduci e riesgo di embehecimento prematuro y e incidencia di hopi patologia di caracter cronico.

Asina un estudio publica den e revista Clinica Chimica Acta, ta afirma, unda cu ta relaciona un consumo regular di e substancianan aki cu un miho estado di salud.

Tampoco nos por lubida e aprobe proteico cu dicho batidonan ta aporta. Ta trata di proteinan di balor biologico halto, cu tur e amino-acidonan esencial cu e curpa no ta capas di fabrica pa su mes.

Un consumo adecua di dicho nutrientenan ta asocia cu un menor riesgo di desaroya problemanan cu ta compromete e masa muscular, segun expertonan.

Un di esunnan mas preocupante lo ta sarcopenia.

Con pa prepara nan di forma adecua?

Ta existi un serie di consideracion cu mester tene na cuenta na ora di prepara batidonan di fruta y yoghurt.

E prome di nan ta cu ta fundamental uza e fruta hente, no solamente e juice. Asina, ta sigura un vaciado gastrico mas lento debi na e presen-

cia di fibra, loke ta reduci e impacto di fructose riba e salud metabolico y riba e glucemianan sanguineo. Di un otro parti, ta recomendabel semper opta pa e frutan cu colornan bibo, manera ta e frutan di mondi (berries).

Esakinan ta conta cu un mayor cantidad di fitonutriente cu capacidad antioxidante, ya cu nan ta, den nan mayoria, pigmento. Por lo tanto, ta maximalisa e aporte di substancianan cu capacidnan beneficoso pa salud.

Por ultimo, semper ta adecua vigila e calidad di yoghurt cu ta inclui na e batico.

Loke ta optimo ta pa uza uno natural, hasta uno Griego si tin mester mayor densidad, y e dieta no ta presenta un caracter hipocalorico. Di tur manera, ta recomenta evita e versionnan di sucu of edulcorada. Sucu ta perhudicial pasobra nan duna un aumento di stress pancreatico.

Sucu artificial, di su parti, ta haci'e modificando e microbiota intestinal.

Ki ora pa bebe batido di fruta y yoghurt?

E miho momento pa consumi batidonan di fruta y yoghurt ta lunch. Durante desayuno y anochi, e curpa no ta asina prepara pa metabolisa sucu debi na e accion di e ritmonan circadiano cu ta controla e produccion hormonal. Sin embargo, kibra di atardi, e organismo ta genera un procesamiento di e carbohidratonan bastante optimo, pa cual ta reduci e impacto negativo di e esakinan riba salud.

Tambe, e ta contene fibra y proteina den su composicion, e fructose di e batidonan di fruta y yoghurt no ta absorbe rapidamente.

Cu esey, ta estabilisa e glucemia y e pancreas no ta sobreexcita.

Otro ingredientenan optimo pa añadi

Ademas di fruta y di yoghurt, ta existi otro ingrediente cu por complementa e batidonan aki di manera fantastico.

Tanto frutan seco como simia ta capas di aumenta e contenido proteico, ademas di aporta acidonan graso di calidad eleva.

Di un otro parti, ta optimo e inclusion di especianan culinario. Esun miho cu sa funciona den e casonan aki ta cane.

Esaki ta conta cu e propiedad di ta beneficoso



di cara pa reduci e riesgo di desaroya diabetes tipo 2.

Hasta, e por ta positivo añadi cacao puro of koffie. Ambos alimento ta conta cu un cantidad eleva di fitonutriente cu caracter antioxidante.

Nan ta capas di eherce un efecto positivo riba e salud cardiovascular den reduci e presion di sanger.

Ademas, tambe nan a demostra nan efecto na ora di yuda preveni embehecimento y e formacion di radicalnan liber.

Un bon eleccion di ingrediente ta clave pa disfruta un batido saludabel. P'esey, ademas di yoghurt y fruta, por agrega frutan seco y simia, por ehempel.

Inclui batidonan di fruta y yoghurt na dieet Apesar cu no na cualkier ora e ta resulta beneficoso, inclui batidonan di fruta y yoghurt den e dieta por aporta nutrientenan positivo pa salud.

No ta trata di un preparacion optimo pa e dieta diario, aunke si e por aparece den e alimentacion cu cierto frecuencia.

E clave pa logra maximalisa su efectonan ta eligi corectamente e frutan cu ta inclui, como tambe e yoghurt cu lo agrega pa e elaboracion di e recetan.

Tambe, cu e obhetivo di aporta un balor añadi por trata di inclui frutan seco of especerij den e operacion.

Tene na cuenta cu e base di un bon dieta ta variedad. Completa e lunch cu e preparacionnan aki cu por genera un efecto positivo, danki na e aporte di antioxidante, probiotico, proteina y lipido.

Esey si, trata semper di huy di e versionnan industrial, prepara nan di forma casero pa sigura su calidad.

FOR SALE

Commemorative coins for collection
75 anniversary Aruba Bank Silver
75 anniversary CMB Bank Silver
50 anniversary
Lago 1924-1974 copper Best offers

Cel 5972155

OPORTUNIDAD PA TRABAO

Tin oportunidad pa trabao pa un
kokki/cocinera y helper di cumind-
anan crioyo pa un Take Away.



**Pa informacion por
wasap 746-3571**

E HENDE MUHE

E hende muhe cu character
ta fuerte y balente.
E hende muhe independiente
mayoria ta inteligente.
E hende muhe orguyoso
cu por ta rebelde, pero generoso.
E hende muhe cu curason di oro
cu amor complaciente y profundo.
E hende muhe amoroso
cu ta un mama perseverante y exitoso.
E hende muhe un ser humano special,
un persona pa semper den nos mente y curason.
Feliz dia Internacional di hende muhe 2022
Lady Ari

FOR SALE - FOR SALE - FOR SALE



Ford Shuttle Bus 2006 ~ E450 diesel
Prijs reduci: Afl. 15.000
Perfecto pa snack truck

739-0101

Pa abona na SOLO DI PUEBLO

**Yama
585 9500
of manda nos un
e-mail na
solodipueblo@gmail.com**

Entrega tur dia te den
bo port'i cas



Servicio na Comunidad

Brandweer	911
Polis	100
Polis Oranjestad	102
Polis San Nicolas	104
Polis Santa Cruz	105
Polis Shaba	107
Tiplijn	11141

Ambulance San Nicolas	584-5050
Ambulance Sasaki	582-5573
Ambulance Wayaca	582-1234

Horacio Oduber Hospital	527-4000
Centro Medico San Nic.	524-8833
SVB AO Ziekmelding	527-2782

Servicio nan

Elmar storingdienst	523-7147
Web storingdienst	525-4600
Setar storingdienst	117
Digicel	145
Reina Beatrix INT Airport	524-2424
Serlimar	584-5080
Arugas	585-1198
Guarda nos costa	913

Aurora Funeral Home	5 8 8 -
6699	
Royal Funeral Home	5 8 6 -
4444	
Ad Patres Funeral Home	584-2299
The Olive trees Funeral Home	582-0000

Fundacion	
Rode Kruis	582-2219
Fada	583-2999
Fundacion Respetami	582-4433
Fundacion Guiami	587-1677
Muhe den dificultad	583-5400
Telefoon pa hubentud	131
Centro Kibrahacha	588-3131
Stichting Bloedbank	587-0002
Mary Joan Foundation	5 8 8 -
9999	

PRONOSTICO DI TEMPO

VALIDO TE DIARANSON 23 DI MAART 2022, 18:00 ORA.

TEMPO:

AWE ANOCHI: PARCIALMENTE NUBLA Y GENERALMENTE SECO
DEN MARDUGA I MAYAN: PARTLY NUBLA CU UN AWACERO PASAJERO

TEMPERATURA MAXIMO 32 GRADO CELSIUS
TEMPERATURA MINIMO 26 GRADO CELSIUS
INDICE DI CALOR (HEAT INDEX) DEN Y ROND
DI ORANAN DI MERDIA: 33 PA 36 GRADO CELSIUS
UV INDEX: 12

BAHADA DI SOLO : 6:51 PM
SUBIDA DI SOLO : 6:42 AM

BIENTO:

MODERA TE BASTA FUERTE FOR DI OOST;
FORSA 4 TE 5 (20 TE 39 KM/ORA, 11 TE 21 NUDO).
DEN DIA FUERTE TE DURO DEN RAFAGA;
FORSA 6 TE 7 (40 TE 61 KM/ORA, 22 TE 33 NUDO).

SITUACION GENERAL DI TEMPO PA PROXIMO 24 ORA:
EXTENCION DI E AREA DI PRECION HALTO RIBA ATLANTICO
LO SOSTENE UN BIENTO MODERA TE BASTA FUERTE Y FUERTE
TE DURO DEN RAFAGA. DI OTRO UN BANDA POR BISA CU
APARTE DI UN AWACERO PASAJERO DEN ORANAN DI MARDUGA
Y MAINTA TEMPO LO KEDA GENERALMENTE SECO.

CONDICIONAN MARITIMO/ ESTADO DI LAMA:
NA PARTINAN PROTEJE DI COSTA: LEVE
NA PARTINAN ZUID: TRANKIL TE MODERA
NA PARTINAN OOST TE NOORDWEST DI COSTA:
MODERA TE POCO BRUTO.

OLANAN LO TA ENTRE 5 PA 7 PIA

AVISO/ ALERTA:

UN AVISO PA BOTO CHIKITO PA PARTINAN OOST TE
NOORDWEST DI COSTA Y LAMA HABRI TA NA VIGOR
TE PROXIMO AVISO.

FENOMENONAN SPECIAL:

UN TEMBLOR BOU DI AWA (ZEEBEVING) A TUMA LOGA PA
12:35 ORA LOCAL NA 10.8°N Y 43.4°W Y 10 KM DI
PROFUNDIDAD. E MAGNITUDE TABATA DI 6.7 RIBA
MOMENT MAGNITUDE SCALE. NO TABATIN MENASA
DI TSUNAMI.

POTENCIAL DI AWACERO PA PROXIMO 24 ORA:
1 MM; LOCALMENTE ESAKI POR VARIA.

REGISTRACION DI TEMPERATURA (GRADO CELSIUS) Y
AWACERO (MM) DEN ULTIMO 24 ORA (8'AM PA 8'AM):

AIRPORT : MAX 31 / MIN 26 / 0.0 MM
WESTPUNT: MAX 32 / MIN 26 / 0.3 MM
STA ROSA: MAX 32 / MIN 26 / 0.1 MM

PRONOSTICO DI TEMPO PA PROXIMO 3 DIANAN:
PARCIALMENTE NUBLA CU UN AWACERO PASAJERO.
BIENTO LO TA FOR DI OOST Y MODERA TE BASTA
FUERTE, FUERTE TE DURO DEN RAFAGA; TEMPERATURA
(GRADO CELSIUS) MAX / MIN LO TA: 32 / 26

Clasificados



SOLODIPUEBLO@GMAIL.COM
CEL.585 9500





SERVICIO Y COMPRA



OBITUARIO

Publica serka nos anuncio di fayecimento di bo ser kerí.
Nos tin 2 pakete pa ofrese

Pakete 1: Anuncio di fayecimento te dia cu e defunto
ser dera
Gradicimento y invitashon pa misa pa 3 dia Afl 250,00

Pakete 2: Anuncio di fayecimento te dia cu e defunto
ser dera
Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00

Pa mas informashon por tuma contacto cu oficina
na **585-9500** of na **741-4554** puntra pa
Jamila Henriquez

CHAPI, VERF, CORIENTE


Ta hasi trabao di corriente verf
welder plumbing metsla carpinte
drecha dak hasi cura limpi

y kap mata

yama: 5608568

SCEPTIC TANK (7 CUBE)

PRIJS SPECIAL
AWG 75,-



YAMANOS NA:
560 3500 OF 563 4201

TA HUUR

den CENTRO COMERCIAL
NOORD un localidad
di 120M
Bon situa, pa mas
info yama: **592-3327**



Hyundai Tucson 2009 Top 1 condition



Call: 5942389

Clasificados



SOLODIPUEBLO@GMAIL.COM
CEL. 585 9500



HACI YAMADA NA ST. EUSTATIUS Y RICIBI OIDO, INFORMACION, GUIA Y CONSEJO NA ARUBA

Den cuadro di exporta conocimiento, desde 16 di maart 2022 Fundacion Telefon pa Hubentud Aruba lo ta dunando oido, informacion, guia y consejo na e muchanan y hobenan di St. Eustatius. Tawata na aña 2019 cu oficialmente e peticion a drenta serka Fundacion Telefon pa Hubentud Aruba for di Openbaar Lichaam St. Eustatius, pa asina Openbaar Lichaam St. Eustatius ricibi sosten for di Fundacion Telefon pa Hubentud Aruba den realisacion di nan propio servicio di telefon pa ayudo di mucha y hoben. Fundacion Telefon pa Hubentud Aruba no a duda y a ofrece sosten tecnico.

Despues di a haci un analisis profundo di e isla a mira cu un operacion di central di telefon pa ayudo di mucha y hoben completo ariba e isla no lo ta factibel. Por ehempel e cantida di mucha y hoben ariba e isla no ta hopi. Na St. Eustatius tin 908 mucha y hoben te cu e edad di 24 aña. Esaki ta haci cu tur persona conoce otro ariba e isla. Esaki por dificulta cu un mucha of hoben lo haci uso di e servicio di e telefon pa ayudo di mucha y hoben, locual lo debilita nan derecho di tin un opinion y vocivera esaki. Na e momento ey e peticion a cambia y St. Eustatius a solicita pa e muchanan y hobenan di St. Eustatius por yama na e servicio di Fundacion Telefon pa Hubentud Aruba.

Na aña 2021 oficialmente e Staatssecretaris di Volksgezondheid, Welzijn en Sport di Hulanda di e tempo ey, drs. Paul Blokhuis, a haci un biaha mas e peticion na Fundacion Telefon pa Hubentud Aruba pa ricibi e yamadanan di e muchanan y hobenan di St. Eustatius.

Despues cu e companianan di telecomunicacion di St. Eustatius y Aruba a yega na un acuerdo cu otro, y e mentornan di Fundacion Telefon pa Hubentud Aruba a ricibi training tocante aspectonan cultural, etnico y e sociale kaart di St. Eustatius, ariba dia 16 di maart 2022 esaki a bira re-

alidad. Ariba dia 16 di maart pa 2:00 di atardi e prome mucha/hoben a marca e number 918 na St. Eustatius y e telefon na Fundacion Telefon pa Hubentud Aruba a ring y e mucha/hoben a ricibi oido, informacion, guia y/of consejo. E ayudo cu lo ser brinda na e muchanan di St. Eustatius lo ta e mesun ayduo cu nos muchanan y hobenan di Aruba ta ricibi. Mesos cu na Aruba, e yamada lo ta gratis y anonimo. Na St. Eustatius e telefon pa ayudo di mucha y hoben lo yama Guana Chat y e number di telefon ta 918.

E ayudo na e muchanan y hobenan di St. Eustatius ta den cuadro di e 'kenniscentrum' di Fundacion Telefon pa Hubentud Aruba cu ta exportando conocimiento. Despues di 22 aña di existencia Fundacion Telefon pa Hubentud Aruba como un 'Kenniscentrum' ta exportando conocimiento na organisacionan gubernamental y no-gubernamental den region. Banda di crea conocimiento y comparti conocimiento, awor Fundacion Telefon pa Hubentud Aruba como un 'Kenniscentrum' ta bai sigui exporta conocimiento.

Un gradicimento ta bai na Setar N.V., Flow, TelEm, Eutel, Openbaar Lichaam St. Eustatius, Ministerie van Volksgezondheid, Welzijn en Sport Nederland y Ministerie van Binnenlandse Zaken en Koninkrijksrelatie.

Pa mas informacion tocante di e servicio cu Fundacion Telefon pa Hubentud Aruba ta dunando na e muchanan y hobenan di St. Eustatius por tuma contacto cu Fundacion Telefon pa Hubentud Aruba via nos facebook: <https://www.facebook.com/telefon.hubentud/>, email: telhubentud@gmail.com of telefon 5886138/ 5884011.

Bellen op St. Eustatius en een luisterend oor, informatie, begeleiding en advies op Aruba krijgen In het kader van het exporteren van kennis, zal de Fundacion Telefon pa Hubentud Aruba vanaf 16 maart 2022 een luisterend



oor, informatie, begeleiding en advies aan de kinderen en jongeren St. Eustatius geven. In het jaar 2019 heeft het openbaar lichaam St. Eustatius een verzoek gedaan aan de Fundacion Telefon pa Hubentud Aruba. Het verzoek ging omtrent steun van de Fundacion Telefon pa Hubentud Aruba aan het openbaar lichaam St. Eustatius met het oprichten van hun eigen kindertelefoon voor de kinderen en jongeren van St. Eustatius. De Fundacion Telefon pa Hubentud Aruba heeft niet getwijfeld en was gestart met het geven van technische steun.

Na een grondige analyse is geconstateerd dat het vestigen van een centrale van een kindertelefoon op St. Eustatius niet uitvoerbaar is. Allereerste reden is dat het aantal kinderen en jongeren niet veel is. Op St. Eustatius wonen 908 kinderen en jongeren tot en met 24 jaar. Op het eiland kent iedereen elkaar. Hierdoor zouden kinderen en jongeren minder snel gebruik maken van de hulpverlening van de kindertelefoon en wordt hierdoor hun recht op eigen mening en uiten van deze mening beperkt. St. Eustatius heeft hierdoor zijn verzoek aangepast. In een nieuwe verzoek heeft St. Eustatius aan de Fundacion Telefon pa Hubentud Aruba verzocht om de kinderen en jongeren van St. Eustatius te laten bellen naar de hulpverlening van de Fundacion Telefon pa Hubentud Aruba.

In 2021 heeft de toenmalige Staatssecretaris van Volksgezondheid, Welzijn en Sport van Nederland, drs. Paul Blokhuis, weer een verzoek gedaan aan de Fundacion Telefon pa Hubentud Aruba voor het ontvangen van de oproepen van de kinderen en jongeren van St. Eustatius.

Nadat de telecommunicatie bedrijven van St. Eustatius en Aruba een afspraak met elkaar hebben gemaakt, de mentoren van de Fundacion Telefon pa Hubentud

Aruba training hebben gekregen omtrent de culturele, etnische aspecten en sociale kaart van St. Eustatius, is het op 16 maart 2022 realiteit geworden. Op 16 maart om 2:00 uur in de middag heeft het eerste kind het nummer 918 op St. Eustatius gebeld en ging de telefoon bij de centrale van de Fundacion Telefon pa Hubentud Aruba over en heeft het kind een luisterende oor, informatie, begeleiding en/of advies gekregen. Dezelfde hulpverlening die de kinderen en jongeren op Aruba krijgen wordt aan de kinderen en jongeren van St. Eustatius gegeven. Zoals op Aruba, de hulpverlening is gratis en anoniem. De naam van de kinderen Telefon op St. Eustatius is Guana Chat en het nummer is 918.

De hulp aan de kinderen en jongeren van St. Eustatius is in het kader van het kenniscentrum van de Fundacion Telefon pa Hubentud Aruba die kennis exporteert. Na 22 jaar bestaan exporteert de Fundacion Telefon pa Hubentud Aruba als kenniscentrum kennis aan gouvernementele en non-gouvernementele organisaties in de regio. Naast het creëren van kennis en delen van kennis, gaat de Fundacion Telefon pa Hubentud Aruba als een kenniscentrum door met het exporteren van kennis.

Bedank aan Setar N.V., Flow, TelEm, Eutel, Openbaar Lichaam St. Eustatius, Ministerie van Volksgezondheid, Welzijn en Sport Nederland en Ministerie van Binnenlandse Zaken en Koninkrijksrelatie.

Voor meer informatie omtrent de hulpverlening van de Fundacion Telefon pa Hubentud Aruba aan de kinderen en jongeren van St. Eustatius, kan je contact nemen met de Fundacion Telefon pa Hubentud Aruba middels ons facebook: <https://www.facebook.com/telefon.hubentud/>, email: telhubentud@gmail.com of telefoon 5886138/ 5884011.

JEON y Kevv ta lansa “M’a Lag’e Caya” remix



Jeon ta lansa remix di e cancion “M’a Lag’e Caya” conhuntamente cu cantante di Curacao mihor conoci na su nomber Artistico Kevv.

Ken por a kere cu un simpel video di tik tok cu a wordo publica riba rednan social Awe 21 di Maart Jeon y Kevv ta lansa un videoclip hunto!

E storia na con e colabra-

cion di Artistanan aki a yega na di graba e cancion ta uno remarcabel. No ta hopi tempo pasa Kevv a post riba su tik tok cu un simpel guitarra su version di M’a lag’e Caya, un cancion ya conoci di Jeon su album Biggy Boy Forever. Jeon un dia diripiente a ricibi yen di mensahe caminda varios persona a indic’e pa e wak e video cu



Kevv a publica riba su tik tok personal. Ora cu Jeon a bin topa cu e video aki, e la gust’e asina hopi cu e la comunica cu Kevv y bise pa nan colabora riba e cancion hunto y traha un remix di dje.

Den un forma hopi espontaneo e videoclip a wordo graba na Rincon na Boneiro.

Jeon a bula bai Boneiro 16 di Maart mainta trempan

caminda e la topa cu Kevv y pasando den barionan, Rincon a toka nan na un caminda hopi special cu nan a dicidi esei lo ta e locacion cu e clip lo wordo graba.



Solo di pueblo pagina social

Ba hasi aña? Bo kier publica un felicitashon den corant. **FREE**

Manda nos un email cu informashon y maximo 6 potret na

solodipueblo@gmail.com
of Yama **585-9500**

Paga bo cuenta online ta facil

Sea
Abonnement
of Aviso



Pago online,
facil y lihe

Pa hasi pago online pone number y adres na
cuenta di banco RBC Sunmax Printing
account # 7700000100152447



Lotto MERDIA
MAART 20

CATACHI	
Sorteo # 3509	
3451	
8290	
8998	
MULTI-X	
X2	
BIG 4	
Sorteo # 3509	
2729	
1OFF	
Sorteo # 1565	
9946	
ZODIAC	
Sorteo # 3509	
4618	
Scorpio	
LUCKY 3	
Sorteo # 383	
590	
MULTI-X	
X2	

LOTTO 5	
Sorteo #	Joker Letter
0 x Jackpot	Proximo Jackpot
0 x Match 4+	
0 x Match 4	
0 x Afl. 12,00	
	320.000,-

LOTTO DI DIA	
Sorteo #	Proximo Jackpot
0 x Jackpot	
0 x Match 4	
0 x Afl. 8,00	
	83.000,-

MINI MEGA	
Sorteo #	Mega Ball
0 x Jackpot	Proximo Jackpot
0 x match 4	
0 x Afl. 500,00	
0 x Afl. 50,00	
0 x Afl. 15,00	
	400.000,-

MINI MEGA	Afl. 775.000,-
------------------	-----------------------

KORSOU	
Sorteo #	

Lotto ANOCHI
MAART 21

CATACHI	
Sorteo # 7594	
6403	
4798	
3307	
MULTI-X	
X2	
BIG 4	
Sorteo # 6638	
5123	
1OFF	
Sorteo # 1343	
3553	
ZODIAC	
Sorteo # 5397	
0142	
Geminis	
LUCKY 3	
Sorteo # 327	
789	
MULTI-X	
X2	

LOTTO 5	
Sorteo #	Joker Letter
0 x Jackpot	Proximo Jackpot
0 x Match 4+	
0 x Match 4	
0 x Afl. 12,00	
	320.000,-

LOTTO DI DIA	
Sorteo #	Proximo Jackpot
0 x Jackpot	
7 x Match 4	
210 x Afl. 8,00	
	83.000,-

MINI MEGA	
Sorteo #	Mega Ball
0 x Jackpot	Proximo Jackpot
0 x match 4	
0 x Afl. 500,00	
0 x Afl. 50,00	
0 x Afl. 15,00	
	400.000,-

MINI MEGA	Afl. 775.000,-
------------------	-----------------------

KORSOU	
Sorteo #	

Lotto MERDIA
MAART 21

CATACHI	
Sorteo # 3508	
1085	
1810	
6267	
MULTI-X	
X5	
BIG 4	
Sorteo # 3508	
6839	
1OFF	
Sorteo # 1564	
1955	
ZODIAC	
Sorteo # 3508	
1550	
Sagitario	
LUCKY 3	
Sorteo # 382	
440	
MULTI-X	
X2	

LOTTO 5	
Sorteo #	Joker Letter
0 x Jackpot	Proximo Jackpot
0 x Match 4+	
0 x Match 4	
0 x Afl. 12,00	
	320.000,-

LOTTO DI DIA	
Sorteo #	Proximo Jackpot
0 x Jackpot	
0 x Match 4	
0 x Afl. 8,00	
	79.000,-

MINI MEGA	
Sorteo #	Mega Ball
0 x Jackpot	Proximo Jackpot
5 x match 4	
0 x Afl. 500,00	
0 x Afl. 50,00	
0 x Afl. 15,00	
	400.000,-

MINI MEGA	Afl. 775.000,-
------------------	-----------------------

KORSOU	
Sorteo #	

AK

GARDEN & MAINTENANCE SERVICES
ARUBA

Sushi di cura?

Nos ta tir'e afo

AWG 50

OFERTA GRATIS OF RESERVACION
+297 7460815
AKGARDENARUBA@GMAIL.COM

BAN TENE ARUBA LIMPI

BALASHI KNIGHTS TA “EDGE” TEAM 99 DEN BATAYA MONSTER!



Calabas - E encuentro entre e ekiponan di domino di Balashi Knights y Team 99 lo keda graba pa hopi tempo den memoria di fanaticada di domino! Diasabra 19 di maart, e dos ekiponan aki a enfrenta otro den e unico y mundialmente famoso Domino Square Garden na Calabas caminda manera dos pitbull brabo nan a dal den otro sin niun intencion di laga los!

Un ril, un calafriu, un ola di terror a pasa door di culpa di es'nan di Team 99 ora sin misericordia, den un frega di wowo, Balashi Knights a sali habri manera un locomotief foi control y tuma un bentaha di nada menos cu 9-2! Varios integrante di Team 99 ya a cuminsa google unda ta bende cabuya barata pa horca culpa na mat'i lechuga! Cos un bira “canta macamba” tampoco un rato despues. Mita “groggy” di tanto sla, Team 99 ta drenta half time cu e score horroroso di 4-11! Ni na Hollywood por a imagina un escenario di terror asina.

Pero, patras aya den cushina, den e centro di Han su “strategic board”, memey di mochinan di mulato, plannan tabata wordo traha den velocidad rapido con pa para e makinaria cora bou liderazgo di Marc y e guy cu ta huma siga non-stop, conoci den circulon sinistro como “Mobutu”. Manera

cu di dos tempo a cuminsa, Han a los e cachonan brabo, cual nan a baha ferozmente ariba garganta di Balashi Knights! Manera un manada di wolf, integrantenan manera Snor Perez, Dr. Tico Dirksz, Ronny y Chics Tromp, Trimon “paga candela”, Gibi “The Coordinator” Webb, y varios mas a cuminsa parti sla rond sin piedad. Den un frega di wowo, Team 99 ta piki 5 wega tras di otro, y e score sensacionalmente ta wordo treci bek den balans na 11-9! Holo di “prt-prt” ta mescla cu huma di siga ora Team 99 ta tabla wega na 13-13! Balashi Knights nan bista ta bira troebel ora manera un cleconchi Team 99 ta keda pega y no tin intencion di laga los mas! Score ta gatia bay pa 14-14, 15-15, 16-16, 17-17, 18-18, 19-19, y den un momento tenso, yena cu adrenalina, Team 99 ta bolbe tabla wega na 20-20! Domino Square Garden ta rementa for di otro den gritonan historico di alivio ora Glen y Jermaine domina Trimon y Marcelino y asina pone Balashi Knights triunfa net-net, preta-preta, un pusha un wanta, cu score di 21-20! What a night! Keda pendiente shonnan, pasobra e virus di domino ta cuminsa plama pisa aya n'e unico y mundialmente famoso Domino Square Garden na Calabas!



Top95fm

Posted by Creator Studio for iOS

1m · 🌐

Bo ta un Early Bird? Renobando nos programacion; Tin oportunidad pa un Early Bird energetico, pa traha di 5am pa 7am.. Nos ta open pa scucha; SEA ta gospel, balada, "lanta'riba".. of programa di oracion of un combinacion. Pa mas informacion, tuma contacto cu nos. top95fm@gmail.com



Trabao boluntario ta bibo na Hilton Aruba Caribbean Resort & Casino



PALM BEACH – Riba Diasabra, 12 di Maart, 31 miembro di e team di Hilton Aruba a hala faha mara y join **ARUBA DOET** 2022, e evento boluntario di mas grandi riba e isla. E evento ta wordo organisa pa CEDE Aruba den cooperacion cu Oranje Fonds, un organisacion non-profit di Reino Hulandes. Hunto nan a mobilisa mas cu 3,000 boluntario, trahando riba 190 proyecto.

E team di Hilton Aruba a wordo asigna cu e trabao pa verf e cura di Xander Bogaerts Basis School na San Nicolas.

E team sumamente motiva tabata contento di por tin e oportunidad pa participa den e evento boluntario aki y sinti orguyoso di por representa un compania cu ta pusha pa duna bek na comunidad.

Hilton a haci un donacion di manpower, biniendo cu boluntarionan di e miembronan di team yena di

motivacion for di Departamento di Recursonan Humano, IT, Revenue, Commercial Services, Security, Accounting, Engineering, Front Desk y Executive Office Departments. Nan a verf henter e cura di scol, incluyendo mesanan di picnic y camanan di flor, den un forma hopi alegre cu combinacionnan di colornan fabuloso, kedando fiel na e promesa di e organisacion por medio di haci bon y pasando bon na mesun tempo.

Hilton su programa [Travel with Purpose] ta e compromiso y strategia cu ta e motor tras di biahe responsabel y turismo globalmente, regarda manera un parti integral di e compania su actividadnan general di sostenibilidad. Trabao boluntario, ta forma gran parti di e nucleo di Hilton Resort su cultura, tando na miembronan di team haciendo donacion di nan tempo y servicio pa duna bek na comunidad.

ARUBA DOET, tabata parti di un organisacion hopi mas grandi cu **NL DOET**, **ARUBA DOET**, **BON DOET**, **CURA DOET**, **STATIA DOET** y **SMX DOET**, tur pasando na mesun momento, na Hulanda y islanan di Reino Hulandes, tur riba e mesun dia.

E fondo Hulandes ta haci inversionnan enorme den causanan social riba nos islanan, y tambe fortalece e relacion entre islanan y Reino. www.oranjefonds.nl




LEY CU TA LIMITA UZO DI PRODUCTIONAN DI TABACO

PROTEHANDO SALUD PUBLICO

5
ARTICULO

Ta prohibi pa bende of duna productionan di tabaco den: Instancianan di gobierno of medico, instancianan di cultura y arte; den instancianan deportivo y den instancianan educativo



DVG

ARUBA LIBER DI TABACO



HALA ROSEA
LIBREMENTE
BREATHE FREELY

Despues di dos aña sin Tier Events Stellaris Casino a honra su clientenan fiel



Tier a bini hunto (03/15) pa un "All you can eat dinner buffet" y cu "premium bar" den e Grand Ballroom di Aruba Marriott Resort & Casino, sigui pa e anochi di dia 16 di maart caminda e grupo silver a disfruta di esaki y a conclui e celebracion cu un fiesta di gala exclusivamente pa e clientenan di Stellaris Casino, den cual por a gosa di Buleria & GIO'93.



Pero despues di dos aña di ningun evento, den fin di siman a tuma luga e prome Dinner Tier Event pa e prome kwartaal di e aña aki. A invita como 600 miembro pa un buffet dinner cu open premium bar, incluyendo cu un fiesta bailabel cu Gio Fuer-tisimo di Corsou. E clientenan a encanta e evento aki, como un muestra di aprecio tambe pa nan sosten incondicional na e famia di Stellaris Casino. Mester menciona cu a parti no menos di \$25.000,= na premio bou di e clientenan!



ORANJESTAD, Aruba – 20 di maart 2022: Ta for di momento cu Covid-19 a yega nos isla y cu nos a haya nos forsa na adapta nos forma si biba y implement'e medidanan di prevencion, cu Stellaris Casino na Aruba Marriott Resort mester a para tur evento den cual ta involvi publico. E casino a hasta mester a cera un tempo y despues a opera durante orario adapta. Durante e dos añanan ey, mas of menos 600 cliente local a sigui sostene e casino, hasta durante temponan di reto. Den fin di siman, tur tabata invita pa celebra y pa casino gradici nan pa e lealtad.

Tur tempo, Stellaris Casino ta organisa un Tier Dinner Event cada kwartaal pa tur su clientenan fiel.

Mester ta miembro di e casino y ta "rate" clientenan dependiendo cuanto nan ta hunga den e casino. Ta parti premio y ofrece beneficio na e grupo aki. Fin di aña ta regala basketnan grandi, nan por keda den hotel na prijs special, mescos ta come den restaurantnan di e hotel, etc. Den pasado a hasta biaha cu e hungadonan pa Puerto Rico, como parti di nan beneficienan.

Pa mantene un status di Tier ta rekeri pa ta un cliente activo pa tres luna consecutivo. E cliente lo cay bou diferente categoria: Platinum, Gold of Silver. For di un clientela local hopi grandi, a saca mas di 600 cliente cu a cualifica pa un tier. Esaki a inicia cu e prome anochi caminda Platinum & Gold

Na varios ocasion, Stellaris Casino, aparte di ta e prome casino cu a introduci un Tier Program pa local cu e casino mas grandi na Aruba, tambe recientemente a sa di premia tur su hungadonan pa un Cruise for 2, cu Norwegian Cruise lines y e experiencia aki ta algo nunca bisto den henter e area di Caribe.

Tocante Stellaris Casino Aruba Marriott Resort & Stellaris Casino a habri na aña 1995 y ta e casino mas grandi riba nos isla. E ta conta cu mas di 160 empleado, cu ta maneha 24 wega di mesa y mas di 400 slot machines. E weganan mas popular riba mesa ta Craps, Black Jack, Three Card Poker y Roulette, mientras cu e mashinnan



mas uza ta esunnan di e sistema 3D y e "Mystery Progressive Jackpots". Stellaris Casino tin bingo regularmente, cu 5 Progressive inclui completamente gratis. Desde siman

pasa e casino ta habri 24 ora pa dia atrobe, pa e weganan di mashin mientras cu e weganan di mesa ta cuminsa pa 2:00pm te cu 4:00am.

FORTALEZA PA FAMIA

Scirbi pa Pastor Marcel Balootje.

TUR MAYOR TIN E DEBER DI COREGI NAN YIU



Tur caminda bo ta tende di Derecho Humano, Derechi di mucha etc, locual mundo ta ofrece. Pero esey no ta kita for di e deber di un mayor, pa lanta su yiu den Señor, stima y coregi su yiu. Pasobra bo yuinan ta di Dios (Ezekiel 18:4 y Salmo 24:1).

Prome lugar lanta bo yiu den Señor ta un mandato di Dios mes, pasobra asina bo ta habri porta di bendicion pa bo yiu. (Efesios 6:4)

Como mayor ta bo deber di stima bo yiu, y den tur circunstancia para hunto cune y guia riba e bon

caminda. (Colosenses 3 vers 21).

Bo deber ta como mayor pone dak riba cabes di bo yiu, pone cuminda riba mesa, y haci tur locual por duna bo yui un crecemento sano. (1 Timoteo 5:8)

Pero awor ta bini e parti di moral y respet, no ta tur lugar cu bo yiu hinca den su cabes abo como mayor por permiti bo yiu bay. (Proverbionan 22:6) Pasobra tin lugar cu ta promove inmoralidad bao di hubentud, cu mester wordo controla, caminda muchanan ta gusta bay pero cu no ta sano pa nan. Ora un mayor ta stima su

yiù, e kier lo miho pe, pasobra e mesun mucha di awe, mester ta un homber of muher di respet mayan cu Dios kier, integro pa henter su bida.

No ta cumbini ningun mayor pa laga cos bay for di man, y despues tin gas-to na psicologo.

No ta cumbini ningun mayor permiti nan yiu ta usa droga, pasobra segun e mucha ta crece e ta bira adicto.

No ta pasobra mayoria mucha den barrio ta sinta na skina di caya, of banda di minimarket bo yiu tambe mester ta den e grupo. Ta imposibel tambe cu bo yiu ta hinca henter dia den su telefon, cu ni awa e no por cohe pa su mes for di frishider. Tene cuenta cu e mucha no a nace digital, y cu e tin di haci trabao den cas, pa e asocia su mes cu bida di tur dia.

Palabra di Dios ta bisa pa nos coregi nos yiuinan, esey ta nifica no laga nan pa nan cuenta. (Proverbi-

onan 19 v 18)

Abo como mayor mester ta ehempel di respet den cas pa asina bo wordo respetá. Pasobra tur locual un hende sembra e ta cosecha (Galatas capitulo 6 vers 7 -10).

Si bo cria yiu sin respet y cu un moral hopi abao, lo bo cosecha berguensa como mayor.

Ni Polis, ni Prison, tampoco Reclausura no por haci e trabao cu abo como mayor mester haci.

Nos ta bolbe ripiti e trabao di instrui y coregi un mucha ta deber di su mayor. Nos tin hopi homber, pero poco tata, ora tur Homber cu tin yiu tuma e deber di tata na serio, anto hopi cos lo cambia, na cas, scol, caya, etc, y tin hopi mucha cu lo sa kico ta obediencia.

Educacion ta cuminsa na cas y for di infancia di e mucha, y esey ta e deber sano sano y sagrado di su mayornan.

Oracion di dia

Un feliz dia bendiciona y cu Dios colma boso cu Su amor y misericordia infinito

"Bo mester a tene misericordia cu bo compañero cria mescos cu Ami a tene misericordia cu bo" Mt. 18, 33

Den e Evangelio di awe Hesus kier muestra nos, cu nos mester ta misericordioso manera e rey cu a pordona su cria tur su debenan na momento cu el a rog'e pordon. Y no sea manera e cria cu a haya pordon di e rey y no por a pordona su mesun cria. Señor ta spera pa nos tin un curason humilde y compasivo cu nos rumannan. Mes-cos cu nos kier ricibi pordon di Dios nos mester pordona nos rumannan cu a falta nos den algun momento. Nos tur como ser humano sa comete erornan y ta spera pa nos ser despensa y pordona. Señor tambe ta spera pa nos tin mesun misericordia cu nos prohimo.

Oracion: Señor, Yuda nos pa cada dia nos por tin un curason misericordioso pa nos por siña pordona. Pa asina nos por biba cu un curason limpi y bunita manera Hesus.
Amen.

HOTLINE



744-0444

CAPT'E
Y MAND'E

FORTALEZA PA FAMILIA. Scirbi pa Pastor Marcel Balootje. **CADA UN DI NOS LO DUNA CUENTA DI SU MES NA DIOS**

E palabra di Dios ta bibo, e ta berdadero y e ta conta pa tur hende mesun cos, Dios ta un bon Dios y su misericordia ta pa semper, e ta duna tur hende e mesun oportunidad, pa acepta Cristo Hesus como nan Señor y Salvador y asina ricibi bida eterna. (Juan Capitulo 3 vers 16 +17). Dios no tin acepcion di persona, tur hende ta mesun hende dilanti di Dios, e diferencia ta bini pa dilanti ora nos no kere den Su Yui Cristo Hesus, y cay den condenacion pasobra nos a scohe scuridad di mundo y atraccion di maldad pa nos biba den dje, y asina nos no por alcanza locual E a priminti na nos. (Juan Capitulo 3 vers 18-21).

Esaki ta locual tur mayor mester pone na conocimiento di nan yuinan, pasobra ora nos no hala nos yuinan su atencion tocante e palabra di Dios, nos mes ta bira nan piedra di tropica, pasobra nos no a cumpli cu e palabra di Dios, pa instrui nos yuinan den e disciplina y instruccion di Señor. (Efesios capitulo 6 vers 1-4). Cada biaha cu un mayor ta permiti of ta consenti algo cu su yiu, sabiendo 100% cu locual bo ta permiti bo yiu haci ta bay contra di e palabra di Dios, bo ta un Piedra di tropica pa bo propio yiu.

Hopi biaha esey ta wordo haci pa complace e mucha, of pa falta di conocimiento di e mayor, of tin biaha e ta hasta na benefi-

cio material di e mayor.

Pero un cos nos tin di tene cuenta cune, cu un dia nos mester duna cuenta na Dios (Romanonan Capitulo 14 vers 12), y esey ta conta pa rico y pover, di tur color y di tur rasa, pasobra ta para scirbi: Cu tur rudia mester dobla di esnan cu ta den cielo, y riba tera y bao di tera, y cu tur lenga mester confesa cu Hesus Cristo ta Señor pa Gloria di Dios Tata. Awor locual ta pasando den e temponan aki cu tin hopi hende ta desvia di e sana doctrina y bay tras di doctrina diabolico, of mas pio satanico, cosnan cu ta Sali riba internet, produci pa mentenan maligno, cu kier hala hopi hende den direccion di perdicion, y hopi ta doctrina nan mes den e locuranan ey, sin sa cu nan ta aparta for di Dios, y asocia cu maldad, y ta buscando tur forma pa hanja atencion den nan bida di error, den cual nan no tin salvacion ni tampoco bida eterna si nan no arepentí. (2 Timoteo Capitulo 3 vers 1-9 y Judas Capitulo 1 vers 4).

Esakinan ta produciendo e stress, depression, ansiedad, miedo y hasta suicidio cu ta menasando tur caminda, pesey mayor un biaha mas nos kier hala bo atencion, pa bo tira un bista riba locual bo yiu ta wak, lesa of scucha, pasobra e diabel ta purba manifesta den tur cos.

Tin hopi hende no sa k




ico ta pasa cu nan yiu, awel abo como mayor ta responsabel pa guia bo yiu den caminda di Señor, papia cune, y si bo no tin conocimiento busca conocimiento berdadero, den

cas di Dios.

Pasobra tur famia mester tin un cas di Dios cu nan bishita constantemente, y caminda e Berdad ta wordo predica y enseña.

Nos salvacion ta personal, pesey scohe awe pa Cristo Hesus y no haci boso curazon duro. (Hebreonan Capitulo 3 vers 7+12+13).



Parokia San Juan Pablo II

Bo opinion y participacion ta conta y ta importante.

Laga nos sa kiko falta den nos Iglesia/nos Parokia.

Nos ta warda bo sin falta pa comparti cu nos.

Pastoor Jan cordialmente ta invita bo persona y bo famia pa participa na e Asamblea Sinodal di nos Parokia.

Invitacion Asamblea Sinodal

Dia: diaranson 23 maart 2022

Ora: 7-9 pm

Lugar: Misa San Juan Pablo II

**PUEBLO A HAÑA SU
PEN BEK**

Pa kualkier informacion
solodipueblo@gmail.com
of
☎ 585-9500



					3		8	5
		1		2				
			5		7			
		4				1		
	9							
5							7	3
		2		1				
				4				9

						2		
	8				7		9	
6		2				5		
	7			6				
			9		1			
				2			4	
		5				6		3
	9		4				7	
		6						

Sopi di Letranan

ARADO
CARRETA
CORRAL
COSECHADORA
ESTABLO
GALLINERO
GRANERO
GRANJERO
HUERTO
PAJAR
POZO
SILO
TRACTOR

C	S	J	U	H	K	G	Y	L	S	B	J	U	J
T	R	A	C	T	O	R	O	O	E	G	K	N	V
C	A	B	S	G	C	A	W	R	J	Z	E	B	F
L	Z	Y	T	P	S	N	O	E	K	J	B	A	E
O	T	R	E	U	H	E	H	J	D	S	T	D	S
P	R	C	U	J	Z	R	Q	N	A	E	O	I	T
T	O	X	N	A	Z	O	D	A	R	R	R	L	A
B	Z	Z	H	Q	C	P	V	R	A	Y	E	S	B
V	K	U	O	O	A	O	A	G	D	N	N	I	L
V	C	L	R	J	A	C	S	Y	O	Z	I	L	O
C	L	R	A	T	O	P	E	K	W	R	L	O	B
K	A	R	S	Q	P	X	Z	I	C	A	L	M	X
L	F	V	R	A	U	M	V	F	I	W	A	V	B
C	O	S	E	C	H	A	D	O	R	A	G	Z	A

El destino te
presentará
dificultades, pero tú
puedes presentarle
remedios.

**STOP CU
HUMAMENTO
TIN HOPI
BENEFICIO**



Salud



Salud Mental



Financiero